

Sudeutsa asaktsa Sesus harere bo hỹ mykaranaha sibo ziwatahaka

Tubabatu Deus Sudeutsa isopykwytša nisispirikpo asahi iharere bo tsikaeni zuba ma zikaha iwaze aty ja Sudeutsa bo ziwatahaka, Sesus soho ty nisispirikpoko. Sesus zuba Deus bo mymyoktyhyrykta atahi myhyrizikwanikita ana hi ziwataha. Deus hyrikoso ituk niapykyryk tahi iwatahi Deus harere ziwataha. Abaka katsa kino niwatihi Sesus soho humo tanymyryky.

Deus tse babata.

¹ Tapara Deus taparaktsa bo ziknapamykysoko iharere ziwabykynaha. Hawa hatsa myzotsa Sudeutsa bo ziknapamykysokonaha. Deus sohokotsa taparaktsa bo iharere ziknatsasokonaha. ² Abaka Deus tatse mybo zipeha, atahi Deus harere mybo motsasoko. Atahi mybarawy nizukni Deus harere eze. Deus isuknihyize ipe:

— Mybarawy tsizubarēna abo nyny my — niy. ³ Atahi imysapyrēnikita my. Atahi imykyzonikita my. Deus wata my, hawa Deus mykara mymywatawyky. Iharere humo mybarawy ezektsa bo pisapywyky. Mybarawy iharere humo wasani mykara. Atahi mysapyzekenihyrikosokda iwaze mymysapybyitsa tsikykaranaha tsimoewynahaze atahi mymyokzohik. Iwaze bijoikpe bo nido. Deus humo ba hawa tohi zikaha ibaze tadyhy. Deus tihi:

— Kapanuryk taba dyhyty — niy.

Deus tse bijoikpe iknyktsitsa ahatsa soho.

⁴ Atahi taparakta my. Bijoikpe iknyktsitsa Deus tsumuēhītsitsa simysapyrētsa maha atakta tsimysapyrēta

babata my. Deus bijoikpe iknyktsitsa soho — Ikiahatsa katsumuêhĩtsitsa tsimaha — my.

Deus ipe niy: — O katse babata tsimy — my ⁵ Ba bijoikpe iknykta soho Deus ipe: — Ikia katse tsimy. Aba azo mozik — niy.

Ana harere ty hi batu tyso. Iwaze tihi: — Ikia kape kazo asopyk.

Utakta ipe katse my — niy.

Anaharere batu bijoikpe iknyktsa bo ziky.

⁶ Iwaze Deus tse babata estuba zubata mybarawy bo zipehaze Deus tihi:

— Bijoikpe iknyktsitsa sizubarêtsa katsumuêhĩtsitsa ibo mynasakibazikiknahaktsa!

“Ikiakta tsamysapyrêta. Ahumo mykurêtsa hỹ”
tsimaha — niy.

⁷ Deus harere papeu humo bijoikpe iknyktsa soho botu ziwatahakanaha.

— Bijoikpe iknyktsitsa katsumuêhĩtsitsa maha.

Mysipehaze aidytsa mykaranaha zopok waha.

Deus harere bo ma mykaranaha.

Asaktsa imysapybara izo hyrity watsa — niy.

⁸ Itse soho zuba Deus harere papeu humo tihi:

— Ikia zuba mybarawy Ezektsa tysipehakakta.

Awahi abazubata tsimy.

Hawa tsimykara ba zimyi wasani tsimykara.

⁹ Hawa ha ty tsipyreña hỹ tynakara, hawa ha ty batu isapy batu hỹ tynakara.

Iwatahi Deus zawatawyhik ba iakyri tabo zikozonaha.

Atuktsa sakurêtsa moziknaha, ikia zuba akubabata — niy.

¹⁰ Deus harere niwatihi papeu humo:

— Ikia abazubata koikny bakta tu mybarawy tsikzukni.

Ikia hi bijoikpe tsikzukni wytyk tsikzukni.

¹¹ Mybarawy mopykba. Ikiakta awahi tsimynapykyk ba zikokza.

Mybarawy mysuk isapy barawa mozik.

Hawa mysuk mysykbaikze mopapykiknaha.

Anawahi mybarawy mysapybyrize mohokda.

Iwaze Deus usa mybarawy isapyzeky mozokni.

¹² Hawa mysuk ty zozozo tsimaha iwaze usta mysuk tsikorobyknaha.

Ikia mybarawy mopykze iwaze usa mybarawy isapyzeky mozokni.

Ikia zuba koikny baktatu astatu tsimy, ba zik tsaikba.

Awahi amysapyrêta — niy.

¹³ Deus bijoikpe iknykta humo batu ziky iwatahi batu ipe my:

— Kabaze dyhy ty! Kapanuryk taba dyhy ty!

Bykyze kazikwy humo asukyrytsitsa aharere bo hyÿ mykaranaha — niy.

¹⁴ Bijoičke iknyktsitsa hawa mykaranaha. Asaktsa sihyrikosotsa maha. Deus tsumuêhîtsitsa maha. Deus tyryktsa bo mysiakzoko, mysitsumuêhînaha. Deus tyryktsa Sesus Kiristu humo simysapyrêtsa moziknaha, iwaze sibo Deus bijoikpe iknyktsitsa mysiakzoko.

2

Deus harere tsiwabytoktonahaktsa.

¹ Deus tse babata mybo ziakzo iwatahi iharere bo tsiwabytoktonahaktsa! Iharere wasani zuba. Pykyhytu iharere bo hyÿ tynakaranaha iwaze myspirikporêtsa tsi-moziknaha. ² Deus harere taparaktsa bo nitsasokonahaze bijoikpe iknyktsa ana ty hi hyÿ nikaranaha. Anaharere bo myzotsa batu hÿ nikaranaha iwatsahi sinini nikaranaha.

³ Katsaktsa ja. Abaka Deus wasania ty tsiwabytoktonahaha zeka Deus pe myzo mysopyk. Deus

wasania ty tywabyziu ahabyizeka batu Deus pe myzo mysopyk. Sinini tsimykaranaha hỹ. Myzotsa watsa sinini tsimykaranaha. Bijoikpe iknyktsitsa batu mybo tyso hawa Deus pe myzo mysopyk. Sesus abazuba tahi ituktsa bo Deus wasania ty nitsaso. Hawa Deus pe myzo mysopyk sibo nitsasoko. Iwaze asahi:

— Nawa ha ty botu tsiwabynaha iharere baba, ana humo kino wasani hỹ — niaha. Iwaze ituktsa mybo nitsasokonaha.

⁴Iwaze Deus siharere bo yhỹ mykara. Tahyrikoso humo hi amy ty kytsa batu zikaha asatu mykaranaha. Deus hyrikoso situk mynapykyryk iwaze aparakbaha mozorobanaha, Deus zikwy humo. Deus isapyha ty aparakbaha bo nyny niy. Deus hyrikoso situk mynapykyryk iwatsahi kytsa sipybyrẽtsa. Iwaha humo Deus siharere bo yhỹ mykara. Iwatsahi wasania ty ahabyi zeka sinini tsimykaranaha.

— *Sesus Kiristu Deus ziphata Deus bo mymyoktyhyryk* —.

⁵Iwaze mybarawy mopykze Deus usa mybarawy mozokni. Deus hi:

— Mybarawy ezytyk ezektsa ahaharere bo yhỹ mykaranaha — niy. Ana kino bijoikpe iknyktsitsa batu tyso. Katsaktsa mybarawy ezektsa bo nitsaso. ⁶Aty Deus harere botu ziwatahaka:

— Kazo kytsa asaktsa nisisukni sipunihikbyitsa maha. Iwatsatuze asaktsa ba zikspiriktsokda.

Sihumo tsimypokzitsiukrẽta.

⁷Abaka bijoikpe ezektsa sihyrizikwanitsa. Mybarawy ezektsa batu.

Aiba tohi mybarawy ezytyk myze mybarawy ezektsa myhyrizikwanitsa tsimoziknaha, Deus humo aparakbaha sizubarẽtsa myharere bo yhỹ mykaranaha.

Simysapyrētsa moziknaha — niy.

⁸ Abaka mybarawy ezektsa ispehatsabyitsa.

Aiba tohi zuba mybarawy ezytyk ezektsa mysipeha.

⁹ Abaka Sesus bo iksa tsimaha. Deus wytyk bo zipehaze jokboa tu mywata niyzik. Bijoikpe iknyktsitsa sihyrizikwanitsa niyziknaha. Abaka mekybotu my. Sesus nihyrikosokda humo atahi abazubata mozik. Aparakbaha iharere bo zuba hȳ mykaranaha. Deus mywatu imypokzitsi iwatahi Sesus mysapyzeken nihyrikosokda. ¹⁰ Deusta koikny bakta tu mybarawy nizukni. Tsizubarēna nizukni. Iwatahi mybarawy ezektsa tatuktu mysisapy tsihikik, ihyrytsa moziknaha anawahi mozihihikik. Iwatahi Sesus mymyoktyhyrykta mysapyzeken sinini nikara, wasani my. Deus aparakbaha humo tsimypokzitsiukrēta iwatahi itse babata mysapyzeken sinini nikaraze — wasani my — Deus niy.

¹¹ Sesus humo mywatu simysapyrētsa moziknaha. Deus tse babata humo simysapyrētsa moziknaha. Sisapyrēnikitsaktsa Deus hyrytsa maha. Iwaze Sesus myzubaha okze:

— O asaktsa simysapyrētsa maha utakta ispe: “katukytsa” kasopyk — niy. ¹² Hawa nitsaso botu Deus harere papeu humo ziwatahaka. Ata tihi:

— Kazo asoho katukytsa bo motsasoko,
izumubanhaze abo mosakibaziki
“O kazo ikia tsamysapyrēta” — niy.

¹³ Deus harere papeu humo ziwatahazo. Ta tihi:

— Utakta Deus humo kaspirikporēta iwatahi iharere bo hȳ iky — niy.

Ata tihizo: — Utakta kahyrytsa tuk mynapykyryk.

Deus hi isty kabo nyny niy — niy.

Iwa botu ziwatahaka Deus harere papeu humo Sesus soho ziwatahaka.

¹⁴ Sesus mybarawy ezekta mywata niyzik. Mybarawy ezektsa ihyrytsa tsimoziknaha. Mytsani myspu tsimaha iwatahi mywata niyzik. Mybarawy ezekta tuze mohyrikosokda ziky. Nihyrikosokdaze hyrikoso sapybara nisipehakata, Satanas inarokota, Sesus humo zikwybyita niyzik. Sesus ba hawa tohi zikzukni iwatahi Satanas zikwybyita niyzik. Tapara Satanas myzubaha ziknamykbabaka abaka batu, Sesus tahyrikosokdawy humo iwaze Satanas myzuba myhyrikosokdawy batu ziky.

¹⁵ Mybarawy ezektsa batu mohyrikosokda tsihikiknaha. Pibiyituhukutu tahapyby myziykyknaha. Tahapetu sisopyk tihi:

— Utakta ba zikara — mynakananaha. Sesus hi mysapyzky nihyrikosokda. Abaka mywatu ispe:

— Tsimyhyrikosokdanaha zeka ahapyby byihu ja — my. ¹⁶ Sesus bjoikpe iknyktsitsa ba ziksitsumuēhī. Mybarawy ezektsa Abarão tsekokatsa asa hi mysitsumuēhīkī asaktsa ihumo simysapyrētsa moziknaha. Atahi Deus bo mysioktyhyryk. ¹⁷ Iwatahi mybarawy ezektsa Deus bo mysioktyhyrykta itukytsa wata niyzik. Mybarawy ezekta niyzik. Sesus taparakta Deus wahoro zubata eze ziknapamykysokota wata niyzik. Atakta Deus tsumuēhītsa my, Sesus niwatihi. Deus tsumuēhītsa my. Ziknapamykysokota mybarawy ezektsa nisitsumuēhīkī Sesus niwatihi mybarawy ezektsa nisitsumuēhīkī. Mybarawy ezektsa humo tsimypokzitsiukrēta hỹ. Sesus Deus harere bo hỹ ziknakara, iwatahi imysapyrēnikita my mybarawy ezektsa sapyzky nihyrikosokda iwa Deus bo nisioktyhyryk iwatahi mywatu ihumo simysapyrētsa moziknaha, iwatsahi Deus pe:

— Myzo — mysopyk. Deus mype:

— Kahyrytsa ahasapybyikitsa tsikykaranaha Sesus humo pahaokzo — iwa Deus mykara. ¹⁸ Sesus sinini

nikara. Satanas hyrikoso sapybara ty zimiywy tshikik naha zetu batu hỹ niy. Iwatahi Sesus mybarawy ezek-tsa mysitsumuẽhĩ. Asaktsa ustsá mysimiywy tshikik-naha ata hi mysitsumuẽhĩkĩ iwatsahi wasani zuba yhỹ mykaranaha. Iwatsahi batu simyi ana humo hi Sesus my-barawy ezekta niyzik iwatahi mywatu namytsumuẽhĩkĩ.

3

Moises Deus tsumuẽhĩtsa. Sesus Deus tse babata.

¹ Iwatsahi Sesus soho humo mytsatziutaha katukytsa! Deus niywatawy ityryktsa tsimoziknaha. Sesus hi mybo nitsasoko Deus zipehata my mywata niyzik. Atakta zik-napamykysokota taparakta myhyrizikwani. Ustsá bo tihi zeka:

— O katsaktsa Sesus mymyoktyhyrykta humo myspirikporẽtsa tsimoziknaha iwatahi mymytsumuẽhĩkĩ hỹ — tsimaha. Iwatsahi Sesus soho humo mytsatziutaha! my. ² Ata kino Deus harere humo hyỹ ziknakara, iharere humo pykyhytu hyỹ ziknakara. Moises Deus harere bo yhỹ ziknakara. Atahi Deus tyryktsa nisihyrinymyryky. Sesus kino niwatihi Deus harere humo pykyhytu hyỹ ziknakara. ³ Atakta abazubata. Sesus abazuba tahi Moiesta jokboata tu iwatahi Sesus harere bo hyỹ tsimykaranahaze wasani tsimykaranaha. Kytsa wahoro mozoknikinahaze katsaktsa:

— O awahoro tisapyrẽta ikia asopykziurẽta — tsikaha. Maku tsihyrinymyrẽta iwahoro nizukniki naha humo. Moiesta jokboata tu zuba myhyrizikwani my. Deus Sesus soho:

— Ikia abazubata — my. Iharere abazubata my. ⁴ Kytsa wahoro zuba nizuknikinaha. Deusta mybarawy tsizubarẽna nizukni.

⁵ Moises Deus hyriziktsokzawy wasani ziknakara. Deus tyryktsa nisihyrinymyryky iwa tarabaja ziknakara. Hawa

Deus mykara nisihyrinymyryky. Deus tyryktsa humo tsimypokzitsiukrēta atakta Deus tsumuēhītsa zuba.

⁶ Sesus Kiristu hi Deus isopyk katse babata my. Atahi Deus hyrytsa humo tsimypokzitsiukrēta hỹ. Katsaktsa Deus hyrytsa tsimaha, atakta myperytsa zubata. Mypuni-hikrētsa zeka katsa tihi:

— O Sesus humo mysapyrētsa tsimoziknaha, mywahi Deus tuk tsimynapykyryknaha ana humo ka mykurētsa hỹ — tsimaha.

Deus tyryktsa iziuha bo tsimypupunaha.

⁷ Iwatsahi Sudeutsa siakbatsa ba siwa zikaha! Tubabatu Deus hyrikoso sisoho ziwatahaka:

— Abaka kaharere tsiwabynahaktsa!

⁸ Kaharere tsiwabyahaze batu hỹ tsimaha iwaze batu tyso.

Taparaktsa ahadiritsa kaharere bo batu hỹ ziknakaranaha sioktsiokanikitsa.

Jerukbara eze tuze kaharere bo batu ma zikaha.

Tahapetu sisopyk:

⁹ “O katsaktsa mysapybyitsa tsimykaranaha zeka Deus myhumo batu iakyri” nikanaranaha.

Sitsyhyryze kazikwy iwatawy iwatsa tu kaharere bo batu hỹ ziknakaranaha.

¹⁰ Kuarēta nityktseheze ziknasitsumuēhīkĩ iwatsa tu kaharere bo batu hỹ ziknakaranaha.

Iwaze sihumo takyriki.

Kapetu kasopyk: “O simysapybyitsa soho humo mytsaty ziknakaranaha.

Kasopyk humo batu sihyrinymyry iwatsahi zikmyikinaha” iky.

¹¹ Iwatahi ikykubyrisorokbyize

batu aty tohi katuk zikapykyryk iky — Deus hyrikoso niy.

Deus harere hi papeu humo botu ziwataha.

¹² O katukytsa pykyhytutaha! Hawa mytsaty tsimykaranaha pykyhytutaha! Deus koikny bakta tu tawahi my atahi zinymyrybata. Hawa ja isapybara bo mytsaty tsimykaranaha zeka tamyikik tsimaha. Iwaze Deus harere humo batu hỹ tsimykaranaha iwatsahi pykyhytutaha! Ahamyspihikbata byihuja!
¹³ Pibiyituhukutu tyharape kusuknikinahaktsa! Iwaze tsimahaze ba ahamyiwy. Deus mydiritsa siakbatsa pe:

— Aba kaharere humo hyỹ tahaktsa — niy. Deus kino myhumo niwatihi — Abaka kaharere humo hyỹ tahaktsa! — my, iwaze tyharape punihikwynahaktsa kytsa! Sesus Kiristu humo tsikaha spirikpotohinaha.

¹⁴ Tapara Sesus humo ahaspirikporëtsa ihumo ahakurëtsa tsikyziknaha. Iharere wasani tsimaha. Ihumo tspirikponaha! Kyze mywahi ituk tsinapykyryknaha. Tsimyhyrikosokdanahaze Kiristu watsa tsimoziknaha.

¹⁵ Deus harere papeu humo:

— Abaka kaharere bo wabytaha!

Kaharere tsiwabytahnaze batu hỹ iwa batu tyso.
 Taparaktsa ahadiritsa kaharere bo batu ma
 ziknakaranaha

Ba siwa zikaha! — niy.

¹⁶ Mydiritsa Deus harere ziwabynaha. Mydiritsa Deus harere humo batu hỹ ziknakaranaha. Asaktsa Moises Esito ekze nisioktyhyryk nahatsa. ¹⁷ Asaktsa jerukbara buruk niukurunaha. Isapybara ty nikaranaha ana humo hi Deus takyriki, iwatsahi jerukbara buruk niukurunaha. Kuarëta nityktseheze ziharamuze. Anaeze sizubarëtsa niakbanaha. ¹⁸ Asa kino Deus harere bo batu hỹ ziknakaranaha. Iwatahi Deus hi:

— Iziuha botu nikymy ba zikapykyryknaha — niy.

Iwa hỹ niy.

¹⁹ Iwatahi ziuha Deus botu nikymyze ba zikpupunaha. Iharere humo batu hỹ ziknakaranaha, iwatsahi iziuha bo ba zikpupunaha.

4

¹ Deus hi mybo nitsasoko tahi:

— Iziuha aha bo ikymyba anaeze tsimypykyryknaha — niy. Katsakta pykyhytu tsimahaktsa! Imysapybara ty tsimykaranaha zeka tsimiywykynaha! Deus harere humo zuba hyỹ tahaktsa. Iwaze iziuha bo tsinapupunahaktsa!

² Mydiritsa siakbatsa Deus harere ziwabynaha. Ana ty hi batu hỹ ziknakaranaha. Deus nisisapywy tsihikik batu zik asahi iharere humo batu hỹ ziknakaranaha. Katsa kino niwatihi Deus wasania ty tsiwabykynaha. Pykyhytutaha anaharere humo hyỹ tsimahaktsa!

³ Katsakta ihumo myspirikporëtsa iwatsahi iziuha bo abaka tsimynapupunaha. Anaeze tsimymybyrynaha. Hawa Deus byrykywy katsa kino niwatihi tsimymybyrynaha. Deus mybarawy nizuknibaze tabyryky, tahyrizikt-sokzawy zipykze tabyryky. Katsa kino niwatihi iziuha eze tsimybry tsihikiknaha. Taparaktsa mydiritsa siakbatsa Deus sisoho tihi:

— Iziuha eze botu ahabo ikymyba
ba zikabyry — niy.

Sihumo takyriki iwa niy.

⁴ Deus tabyrywy soho iharere papeu humo ziwatahaka:
— Nawa zuruze usta tsyhyry humo estuba zuba ziakbataze
Deus mybarawy nizukni.

Kyze nawa zuruze usta tsyhyry humo petok ziakbataze tabyryky tahyriziktsokzawy zipykze — niy.
Deus harere papeu humo ibyrykywy soho.

⁵ Deus harere papeu humo ziwatahazo mydiritsa siakbatsa soho:

— Iziuha eze botu ikymyba ba zikabyry — niy.

⁶Deus iziuha bo kytsa mynapupunaha mozihihik. Asaktsa mydiritsa siakbatsa hi iziuha eze Deus botu sitsyhyryze zikymyba, ba zikpupunaha, anaeze ba zikabyry. Iharere humo ma zikahabyitsa tuze iziuha bo batu paku paku. Iwaze Deus ustsya kytsa iziuha bo mynapupunaha iwa mozihihik. ⁷Bykyze iwatahi usta zuruze soho:

— Abaka kaharere humo hyĩ tsimaha — niy. Deus harere Dawi ziwatahaka hi:

— Abaka kaharere bo wabytaha!

Kaharere tsiwabytaha zeka ahasopyksapyhu ja — niy.

Iwa Dawi tsekokatsa ziwatahaka.

⁸Sosue nihyrikosokdata Deus tyryktsa, Kanaã bo nisioktyhyryk. Deus iziuha nisioktykyryk zeka Deus usta zuruze soho:

— Abaka kaharere bo hyĩ tsimaha — batu tyso. Nawa Dawi ziwatahaka ustsya tyryktsa soho niy. Asahi Deus iziuha bo mynapupunaha. ⁹Iwatahi Deus hyrytsa pe niy:

— Kahudikhudikwy tisapyrëna bo tynapupunahaktsa! — my. Deus mybarawy nizuknize iwaze tabyryky. Tabyryky nahawatihi katsa kino tsimymybyrynaha anawahi Deus mozihihik.

¹⁰Deus sapy iziuha bo tsinapupunaha zeka tsimymybyrynaha. Myhyriziktsokzawy mopyk. Hawa Deus tabyrykyze katsa kino tsimymybyrynaha hỹ. ¹¹Iwatsahi Deus hudikhudikwy tisapyrëna boktsa! Ana soho bo hi mytsatzyiutahaktsa! Mykubyrisorokrëtsa tsimoziknaha iwaze iziuha bo tsimaha. Ba siakbatsa wa zikaha. Asaktsa Deus harere humo batu hỹ ziknakaranaha iwatsahi Deus hudikhudikwy bo ba zikpupunaha.

¹²Deus harere ka simyharerewabytsa wata my. Iharere mynamyhyrinymyryky. Deus harere tsiwabytahnaze hawa ha ty mytsaty tsimykarana mymywatawyky.

Hawa tsimyzihikiknaha mymywatawyky. Mytsaty tsimykaranahaze hawa ha ty wasani my Deus harere mymywatawy. Mytsaty tsimykaranahaze hawa ha ty batu isapy iharere mymywatawy. Deus harere sokorotsapu wata. Sokorotsapu titsarirêta, petok taba itsariwyhyta tawata. Siraratsa nizyzykyrywy wata. (Ipoiktsa sotsokowy buruk maha sokorotsapu tuk tszykwynaha. Iwatsahi myraratsani sipoiktsa iknyktsa siboknaha.) Hawa sokorotsapu myraratsani metutu mykara nawaze Deus harere hawa mytsaty tsimykaranaha hawa tsimyzihikiknaha metutu mykara.

¹³ Deus zinyba hỹ, katsa ba ijokbyi bo zikaha. Hawa tsimykaranaha zinyba. Tsimyhyrikosokdanahaze atahi mymywaby. Tsimytsasonahaze:

— O nawa ikykara — botu ziny iwaze hawa tsimyt-sasokonaha wasani tsimaha zeka tsihyrinymyrêta. Iwatsahi mydiritsa watsa byitahaktsa! Deus harere bo hyỹ tsimahaktsa iwaze Deus hudikhudikwy tisapyrêna bo tsimypupunaha

Sesus ziknapamykysokota babata myhumo tsimypokzitsiarêta.

¹⁴ Tubabatu taparakta ziknapamykysokota Deus wahoro zubata bo ziknatsukuk. Iwatahi Deus tse babata bijoikpe bo nitsuk Deus tuk. Atahi abazubata. Iwatsahi ihumo tsimyspirikpotohinaha.

¹⁵ Taparakta Deus wahoro zubata eze sizubarêtsa nisitsumuêhĩkĩ. Asaktsa batu sipunihik nisitsumuêhĩkĩ. Sesus hi mymytsumuêhĩkĩ atahi mybarawy eze ziknapykyrykze sinini ziknakara. Iwatahi mymytsumuêhĩkĩ. Satanas zimyiwy tsihikik Sesus iharere bo batu hỹ ziknakara. Iwaze Satanas nimymiwy tsihikikze Sesus mymytsumuêhĩkĩ myhumo tsimypokzitsiukrêta. Atahi mymy-pokzitsiki ta mywata niyzik. Hawa haty tsimykaranaha

zinyba iwatahi mymytsumuēhīkī. ¹⁶ Iwatsahi Sesus bo tsipomokonaha. Mysikpybybyitsa Deus myzo bo tsimypamykysobanaha. Mypunihikrētsaktsa! Deus myzo hi mymysapywyikik. Myhumo tsimypokzitsiukrēta. Mypunihikbyitsa zeka atahi mymytsumuēhīkī. Iwatsahi mypunihikrētsa tsimoziknaha.

5

¹ Hawa taparaktsa Deus wahoro zubata eze ziknapamykysokonahatsa siwatawyhytsa niyzik naha mot-sasoko. Deus nisiwatawy kytsa tu nisiwatawy. Iwaze kytsa nisitsumuēhīnaha ana humo hi Deus nisiwatawy. Nawa ha ty kytsa Deus bo zibiakaknaha ana kino Deus bo nyny niaha. Aparakbaha humo nyny ziknakaranaha. Deus okzeka myraratsa nisiwezokonaha iwatahi Deus sitsihitsa humo batu iakyri simysapybyitsa nikaranaha nisiokzohik.

² Sipunihikbyitsa tu iwatsahi harape humo simypokzitsiukrētsa niaha. Asaktsa zimyikinahatsa humo simypokzitsiukrētsa. Asaktsa batu sihyrinymyry niwatihisi humo simypokzitsiukrētsa. Taparaktsa Deus wahoro zubata eze ziknapamykysokonahatsa sipunihikbyitsa kino nikaranaha. Iwatsahi ustsaha humo simypokzitsiukrētsa niaha. ³ Asaktsa kytsa watsa. Iwaze myraratsa Deus okzeka nisiwezokonahaze asahi:

— O Deus kamysapybyita tu ikykara iwatahi karara ty ikia bo nyny my iwaze tsikokzohik. Iwaze ikia kape:

“Amysapybyita tu tsikykara paokzohik myraratsa tsihitsa niwatihisi simysapybyitsa tu nikaranaha iwaze myraratsa ty kabo nyny tsimykara iwaze mysiokzohik my” — nikaranaha. ⁴ Batu aty tohi ziktawatawy ziknapamykysokota zikyzyk. Batu. Deus humo maku ziknapamykysokota mozik ata hi maku ziwatawy. Arō

tapara ziknapamykysokota niy. Deus humo iwatawyhyta niyzik.

⁵ Taparaktsa Deus wahoro zubata eze ziknapamykysokonahatsa siwatsa Kiristu mynakara. Siwatsa ba ziktawatawy, Deus hi ziwatawy. Iwatawyhyta tu Deus ipe niy:

— Ikiakta katse, abaka azo mozik — Deus niy.

⁶ Usta harere Deus papeu humo ziwatahaka:

— Merikisedek wata tsimozik.

Merikisedek Deus ziknapamykysokota Deus wahoro zubata eze ziknakara.

Aparakbaha nisibetesaka Sesus iwata katyryktsa tysitsumuēhĩ mynakara.

Mysibetesaka, tawahi mysitsumuēhĩkĩ

Deus harere papeu humo niy.

⁷ Sesus mybarawy ezekta tu Deus bo ziknapamykysoko. Deus bo hua hua niy, ihyritsik zipoko. Deus zikwybata tu nizihikik zeka ziaксе iwa zeka batu zikyrikosokda. Iwaze Deus zitsumuēhĩkĩ Sesus tasoho bo zuba batu mytsaty ziknakara, tazo bo zuba mytsaty ziknakara. Iharere bo zuba hyỹ ziknakara. Iwatahi Deus iharere ziwabyky.

⁸ Atakta Deus tse babata niy. Iwatatu sinini ziknakara ana humo hi Deus harere bo hyỹ ziknakara. Sinini nikara atahi Deus harere bo hyỹ ziknakara ana humo hi zinymyryky. Anahumo ihyriziktsokzawy nikymyba.

⁹ Atakta tsimysapyrēta. Imysapyrēnikita tu mybarawy ezektsa Deus bo mysioktyhyryk. Asaktsa iharere bo zuba hyỹ mykaranaha, ihumo simysapyrētsa moziknaha. Deus tuk tahawahi mynapykyryknaha. ¹⁰ Deus Sesus pe niy:

— Iki zuba tapara ziknapamykysokota tsimozik. Merikisedek wata tsimozik. Mybarawy ezektsa tysitsumuēhĩ mynakara, koikny bakta tu tawahi mysitsumuēhĩkĩ — Deus niy.

Deus harere tsipinymyrytohinaha.

¹¹ Tapara ziknapamykysokota niy. Hawa Sesus Kiristu Merikisedek wata pahahyrinomyrykyzyky. Hawa ha ty tsihokdaharëna batu ahawabyhy. Ana harere tsihokdahrëna humo batu wabyziu zikaha.

¹²⁻¹³ Tapara Deus harere bo hyÿ tsimykarannahaze hawa batu ihokdaha ahahyrinomyrëtsa. Hawa wasani batu ahahyrinomyry. Hawa batu imysapy batu ahahyrinomyry. Ikiatsa sibykyhytsa watsa tsimaha. Ibykyhy taje tsotsik pezuku tawata tsimaha. Ibykyhy myzoho bazikboro ikiatsa iwatsa tsimaha. Aibani zuba ibykyhy siraratsani piboro. Iwaze ikiatsa Deus soho tsimysihyrinynomyrynahatsa watsa ustsya kyttsya zuba pahahyrinomyrykynaha. Ikiatsa hawa ha ty wasani ahape tu ahasopyk iwatsahi ahamysapyrëtsa tsimoziknaha. Batu ba hawa tsihokdahrëna batu ahahyrinomyry iwatsahi sibykyhytsa watsa.

¹⁴ Aty skaraba Deus harere bo zuba hyÿ mynakara hawaha tsihokdahrëna pinomyryky, iwaze tsimysapyrëta mozik. Asaktsa siypyktsa watsa maha, asahi myzoho piboronaha. Hawa Deus okzeka wasani my sihyrinomyrëtsa, hawaha ty batu sapy sihyrinomyrëtsa niwatihi. Sispirikporëtsa moziknaha. Tahapetu sisopyk iwatsahi sispirikporëtsa moziknaha. Iwatsahi siypyktsa watsaktsa kyttsya Deus harere piwabyziukunaha.

6

¹ Kiristu harere, nawa ha ty botu tsiwabynaha ana soho bo hi mytsaty mytsaty byitaha! Ana myspirikpowy batu ihokdaha hÿ. Ana myspirikpowy:

— Ahamysapybyitsa tsikykarannaha ana humo hi Deus tuk batu tsinapykyryknaha iwatsahi tsmoewynaha! Deus

harere bo hyĩ tsimykaranaha iwatsahi tsimyspirikpokonaha. ² Pihik ty myharasusuwy! Utsa kytsa tahatsyhyrypetsa ty ahaharek humo paik mahaze Deus hyrikoso ahatuk mynapykyryk. Deus siakbatsa nasihyrizikpobazo. Asaktsa Deus harere bo batu hỹ mykaranaha Deus sinini ykarawy bo mysipeha — niy. Ana kino botu tsinymyrynaha abaka usta myspirikpowy tsiwabytoktokonahaktsa! Iwaze tsipinymyrybanahaktsa kytsa. ³ Iwatahi ana hi tsihokdaharēna ahabo tsimytsasoziukunaha. Katsa hi:

— O Deus ikia tynamytsumuēhĩkta tsimahaktsa! — tsimaha.

⁴ Kiristu harere zimoewynahatsa hawa ja niaha. Tubabatu Kiristu harere ziwabynahaze iharere bo yhỹ niaha. Deus hyrikoso situk niapykyryk. ⁵ Asahi:

— O Deus harere tisapyrēna hỹ — nikaranaha. Hawa ha ty kytsa batu zik Deus mykaraze, iwaze asa tihi:

— O Deus zikwyrēnikita my. Ata hi zuba mybo mynasikzo ana ty hi mykara — nikaranaha. Ihumo sipybyrētsa. ⁶ Iwaze Kiristu zerekeknaha ihumo batu sispirikpo niaha. Simysapybyitsa nikaranaha batu isty erek batu zikaha. Sesus Kiristu humo mospirikpozona-haze batu zikaha. Nispirikpobyinahatsa tu kytsa watsa asaktsa Deus tse iharapatawyhyta humo pihyrizikyzykyzonaha. Deus tse pimiyjakanaha. Asahi Deus tuk ba zikakpykyknaha.

⁷ Hawa mytsuhuk humo mymywatawyky. Mytsuhuk piokyrywynaha. Hyritsik mynawōze siriktsa moziponaha. Iwaze mydisahawyrētsa tsimoziknaha. Iwa Deus nimysapywyky. ⁸ Usa waratok batu isapy my. Tserekrēna. Towahaditsa zuba mopykyryknaha. Anahi waratok batu mydisahawyky iwa zeka taoketarahoko. Waratok batu sapy hỹ. Na wata asaktsa Kiristu zerekeknahatsa tu Deus sinini ykarawy bo mysipeha.

⁹ — O katukytsa ikiahatsa mekywa tu tsimoziknaha. Asaktsa Kiristu zerekeknahatsa batu siwatsa tsimaha. Kiristu humo ahamysapyrëtsa tsimoziknaha. Sesus humo tsimyspirikpotohinaha — tsimaha.

¹⁰ Ikiahatsa Deus hyriziktsokzawy humo tsikykaranaha. Tapara ahaturukytsa tsiksitsumuëhikñnaha. Kiristu tuktsa humo tsipokzitsinaha. Abaka niwatihi Deus tyryktsa mysitsumuëhñnaha. Iwaze Deus humo ahamypokzitsarëtsa tsiwatawukynaha. Ana humo kino Deus ba zikspiriktsokda iwaze pahasapywykyry. Atakta imysapyrënikita tu pahasapywyky. ¹¹ Sesus myziksizo iwatsahi taperykynaha. Taperykynahaze tuharapokzitsikinahaktsa! Tyharape tsumuëhñtohinahaktsa! Anaeze tu tsimyzihihikñnaha. ¹² Ahazikabyrihuja! Pykyhytuty ahahyriktsokzawy humo tahaktsa! Kytsa asaktsa tubabatu Deus humo sispirikporëtsa babatsa siwatahaktsa! Deus ispe niy:

— Aibani pahasapywyky — niy. Siakubyrisorokrëtsa tu ziperykynaha bykyze Deus isapyhanikia ty sibo nyny niy. Siwatsa tsimahaktsa kytsa! Ahakubyrisoroku ja tsimaha.

Hawa ha ty Deus nitsaso atsatu mykara.

¹³⁻¹⁵ Taparakta Abarão iwa niy. Atakta tispihikrëta. Deus ipe niy:

— Ikia pasapywyky. Kazikwy humo atse mopuruk ihumo atsekokatsa sizubarëtsa moziknaha. Kaharere wasani atsa tyty mykara — Deus niy. Atakta tsimyharerewabyrëta tu iharere wasani hñ, atsatu nikara. Abarão iharere bo hyñ nikara. Tapetu isopyk:

— Deus katse ty kabo nyny my — nikara. Tispihikrëta niapykyk. Iwatahi Deus harere humo itse nipuruk. Deus harere wasani nikara. Iwa hñ.

¹⁶ Katsaktsa tsimytsaso tsihikiknahaze — Myharere wasani hỹ — my iwaze Deus okzeka myharere wasaniha. Katsa hi:

— O Deus ziknyba hawa motsasoko wasani mykara — my. Iwaze kytsa mysoho iharere wasani my. Hawaha motsaso atsatu mykara maha. Iwaze ba zikahapebetsaknaha, wasape nikara.

¹⁷ Deus kino niwatihi tatyryktsa pe:

— Utakta pahasapywyky ikiahatsa katuk ahawahi tsimynapykyryknaha — niy. Ityryktsa bo ziknapamykysoko atahi:

— Kaharere wasani my. Utakta koikny baktatu kaharere atsatu mykara. Kaharere zuba — niy. ¹⁸ Deus mype niy:

— Utakta pahasapywyky — niy. Ata tihizo:

— Kaharere babaka wasani mykara — niy. Ana harere soho batu mytsaty my. Tozeka ja ba harere mykara. Batu ba. Deus ba zikmypsiphikbata iharere humo wasani my. Iwatsahi mypunihikrẽtsa! Katsaktsa botu Deus pe:

— O myzo ikia humo mysapyrẽtsa tsimoziknaha — tsikaha. Iwatsahi taperykynaha! Atakta mymysapywyky, ihumo mysapyrẽtsa tsimoziknaha ana hi taperyky iharere humo taperyky. ¹⁹ Deus humo mysapyrẽtsa tsimoziknaha, mywahi ituk tsimynapykyryknaha iwatsahi taperykynaha. Iwatsahi mypunihikrẽtsa. Iharere humo mykurẽtsa. Deus harere humo batu mypyby atahi mymysapywyky iwatsahi mykurẽtsa tsimoziknaha. Deus tuk mywahi tsimynapykyryknaha ana hi taperykynaha.

Tubabatu taparaktsa Deus wahoro zubata eze ziknapamykysokonahatsa Deus sapy eze ipokpedawy bo nikaranaha. Atahi tapara ziknapamykysokota anaeze nitsuk hokbowy ty panu hi iokpezawy ty ana bo hi nitsuk Deus bo ziknapamykysoko myraratsa spu Deus bo nyny niy. Kytsa tsyhyryze Deus bo ziknapamykysoko. Sesus

niwatihi bijoikpe bo nitsuk. Anaeze Deus bo isapyha ty nyny niy. Anaeze Deus mopykyk naha bo hi nitsuk iwaze isapyha ty nyny niy ziknapamykysokota wata. Abaka Deus baze atahi mytsyhyryze mynapamykysoko.

²⁰ Tapara Sesus bijoikpe bo nido. Myharaze Deus bo niy. Atahi tapara inapamykysokota niyzik. Iwatahi mytsyhyryze Deus bo napamykysoko, anaeze Merikisedek wata ityryktsa tawahi mysitsumuêhikî. Aibani Deus bo mymyoktyhyryk ana hi taperykynaha.

7

Merikisedek Serusarêhe zipehata Deus bo ziknapamykysota niwatihi.

¹ Abaka Merikisedek soho motsaso. Atakta Serusarêhe ezektsa bo zipehata niy. Kytsa tsyhyryze Deus bo ziknapamykysoikik. Taparakta Abarão tasukyrytsitsa bo niwatsoroko, nipykze tawahoro bo ziksikiri. Ske buruk Merikisedek zihobyk. Merikisedek ipe niy:

— Deus zuba pasapywyky, isapyrênikia ty abo nyny my — niy.

² Abarão niwatsorokoze tasukyrytsitsa namy ziaakse-baik. Sinamy ty tsapukte buruk tuze iwaze ibo zibiakak. Tsizubarêna ty ibo nyny niy. Inamy mytsyhyrytsa sepyk nawaha estuba ibo nyny niy usta namy ty are niy. Iwa Merikisedek bo zibiakak. Merikisedek zinaro piwatawy tih:

— Atakta tatyryktsa humo wasani ziknasipehaka — my. Serusarêhe hudikhudikwy ezekta mypehakatsa niy. Serusarêhe hudikhudikwy naro piwatawy.

— Ata humo ihyrytsa sakurêtsa moziknaha — my.
³ Deus harere Merikisedekzo soho ty batu tyso. Taje soho ty batu tyso. Tadiritsa soho ty batu tyso. Tapurukwy ty batu tyso. Tahyrikosokdawy ty batu tyso. Atakta

Deus tse babata wata niy. Deus bo ziknapamykysoikik. Merikisedek ityryktsa bo tawahi nisitsumuēhikī.

⁴ Atahi tsimyharerewabyrēta nawa ha ty ahabo motsasoko. Isoho bo mytsatyziutahaktsa! Abarão mydiri taparakta tu tanamy ty tsapukte buruk zibiakak. Taparaktsa sisukyrytsitsa namy ziakse ana kino nyny niy. Abarão isoho bo mytsaty nikara:

— O atahi tsimysapyrēta my — niy. Iwa mytsaty nikara. ⁵ Tubabatu Abarão tsekokatsa Rewi inarokota Moises ihyrytsa pe:

— Ahatukytsa tahanamy ty tsapukte buruk ahabo pibiakaknaha. Ikiahatsa Deus wahoro zubata eze ziknapamykysonahatsa humo tahanamy ty tsapukte buruk ahabo nyny maha. Sinamy mytsyhyrytsawa sepyk nawa mahaze estuba ahabo nyny maha — niy. Iwa Moises harere papeu humo ziwatahaka. Rewi hyrytsa tahatukytsa namy ty zikziaksekenaha, namy ty sibo zikzibiakaknaha. Sizubarētsa Abarão tsekokatsa niaha iwatuze tahatukytsa namy ty sibo nyny nikaranaha.

⁶ Merikisedek mekywa tu niy. Atakta batu Rewi tukytsabyita niy, usta mekta tukytsa tu niy. Iwatatu Abarão tanamy ty ibo zibiakak. Inamy mytsyhyrytsawa sepyk nawaha ty estuba myze ibo nyny niy. Tapara Deus Abarão pe:

— Naka ahudikhudikwy mozik. Atsekokatsa sizubarētsa moziknaha — niy. Iwa Deus harere Abarão pe niy. Kyze Merikisedek Abarão pe niy:

— Deus pasapywyky ahumo tsimypokzitsiukrēta — niy. ⁷ Abarão ihyrizikwani ibo nitsaso. Merikisedek tihi:

— Deus pasapywy ahumo tsimypokzitsiukrēta — niy. Aty anaharere motsasoko tsimyharerewabyrēta hỹ. Atakta isoho motsasoko abazubata kytsa iharere bo ma nikaranaha. ⁸ Kytsa sizubarētsa Deus wahoro zubata

eze ziknapamykysonahatsa tahanamy ty sibo nyny mykaranaha. Asaktsa hawa eze mohyrikosokdanaha. Merikisedek batu ata hi meky watu my. Deus harere hi:

— Merikisedek ispitu my — niy. Iwaze Abarão tanamy ty tsapukte buruk ibo zibiakak.

⁹⁻¹⁰ Merikisedek ske buruk Abarão zihobykze batu itsekokatsaka. Rewi itsekoka ipurukbyize, aibani zuba nipuruk, iwaze itsekokatsa Abarão eze tu niapykyryk. Iwaze Abarão tanamy ty tsapukte buruk ibo zibiakakze Rewi Abarão tsekokatsa tadiri tuk my, iwatahi ata kino niwatihi ibo nyny niy. Ipurukbyita tu tadiri tuk inamy ty Merikisedek bo nyny niy. Atakta tapara ziknapamykysonahatsa Deus wahoro zubata eze sibo abaktsa kytsa sinamy pibiakaknaha. Ata hi Merikisedek bo inamy ty nyny niy.

¹¹ Asaktsa Deus wahoro zubata eze ziknapamykysonahatsa mymyhyrinymyrykynaha. Iwatsahi Deus harere bo zuba hyĩ tsimykarannahaze mysapyrëtsa tsimoziknaha ana hi sihyriziktsokzawy maha. Rewi tsekokatsa Deus wahoro zubata eze ziknapamykysonahatsa tu batu sipuni-hik, Deus harere sihumo tsihokdaharëna. Iwatahi Deus usta ziwatawy atakta mytsyhyryze ziknapamykysokota niyzik. Kiristu ziwatawy. Atahi Deus wahoro zubata eze ziknapamykysokota niyzikze, batu Rewi tsekokatsa watsa, ata hi Merikisedek wata niyzik. Kiristu zikwy mytuk mynapykyryk iwatsahi Deus harere bo hyĩ tsimykarannaha. Ihumo mysapyrëtsa tsimoziknaha.

¹² Rewi tsekokatsa Moises harere humo Deus wahoro zubata eze ziknapamykysonahatsa. Abaka Deus usta ziwatawy, ityryktsa sitsyhyryze ziknapamykysokota niyzik. Abarão hi atakta koikny baktatu Rewi tsekokatsa sisapyzeky niyzik. Rewi tsekokatsa humo ba mysapyrëtsa tsimoziknaha ba zikyknaha. Kiristu humo zuba mysapyrëtsa tsimoziknaha iwatahi Deus ziwatawy. Abaka

Moises harere humo batu myhyrinymyry tsihikik, Kiristu harere bo zuba hyĩ tsimykaranaha. ¹³⁻¹⁴ Atakta Deus zipehata mybetesatsa mozik batu Rewi tsekokatsa niy. Deus ipe niy:

— Ikia katyryktsa tsyhyryze kawahoro zubata eze tynapamykysokota tsimozik — niy. Atahi batu Rewi tsekokatsa niy. Atakta Suda tsekokatsa niy. Moises batu tyso Suda tsekokatsa soho:

— Ikiahatsa Deus wahoro zubata eze ziknapamykysonaahatsa anaeze myraratsa mysiwezonaha iwaze myraratsa ty Deus bo nyny tsimykaranaha — iwa Moises batu tyso.

Usta ziknapamykysokota Merikisedek wata.

¹⁵ Iwatahi Rewi tsekokatsa Deus wahoro zubata ziknapamykysonaahatsa batu ihyriziktsozkaha zikaha. Deus usta zipehata sisapy ziake. Sesus Kiristu zipehata Merikisedek wata my. ¹⁶ Atahi Deus wahoro zubata eze mynapamykysota niyzik. Kytsa harere humo, batu mynapamykysota niyzik batu sisopykwy humo kino niwatihi mynapamykysota niyzik. Atahi ispitu my, koikny bakta tu iwatahi Deus wahoro zubata eze mynapamykysokota niyzik. ¹⁷ Deus harere isoho papeu humo botu ziwataha: — Ikia kawahoro zubata eze tynapamykysokota.

Kahyrytsa tsyhyryze tynapamykysoko awahi tysitsumuēhĩkĩ hỹ,

Merikisedek wata tynakara — niy.

Deus harere papeu humo ziwatahaka.

¹⁸ Asaktsa Moises harere bo yhỹ nikaranaha batu sipunihik, ana harere humo aparakbaha Deus bo ba ziksioқтыhyryk. Iwatahi Deus hi:

— Moises sopyk humo ba tsimyzurukunaha. Kaharere, abaka humo zuba hyĩtahaktsa kytsa! — Deus niy. ¹⁹ Moises sopykwy humo ba mysapytsa zikyzykna. Sesus hi Deus bo mymyoktyhyryk ata humo hi Deus

okzeka mysapyrëtsa tsimoziknaha, iwatsahi taperykynaha.

²⁰ Deus Sesus ziwatawyze iwahoro zubata eze mynapamykysokota mozik. Atahi:

— Pawatawyhik kawahoro zubata eze mynapamykysokota botu iktsaso atsatu mykara. Utakta koikny bakta tu my kaharere botu iktsaso wasani mykara — niy.

Tapara Rewi tsekokatsa nisiwatawyze iwahoro zubata eze ziknapamykysonahatsa niyziknaha ana harere ty batu tyso nisiny zuba niy. Sesus bo zuba ana harere nitsasoko.

²¹ Deus harere papeu humo:

— Ikia kawahoro zubata eze tynapamykysokota,
kahyrytsa tsyhyryze awahi tysitsumuëhĩkĩ.

Ahyriziktsokzawy batu zikpykba

awahi tynapamykysokota tsimy — niy.

Deus harere wasani my ba meky watu mytsaty tykara.

²² — Nawa ha ty botu iktsaso atsatu mykara — niy. Iwa Deus Sesus pe zuba niy. Iwatahi iharere abaka wasani mykara. Sesus humo zuba ana harere abaka bazimyi wasani Moises Deus harere nitsasoko ana harere wasani niy. Iharere abaka Sesus pe wasani.

²³ Rewi tsekokatsa Deus wahoro zubata eze ziknapamykysonahatsa nikaranaha. Ziknahyrikosokzakana-haze mektsatu ziknahrabe sapyzekykynaha. Iwa hỹ.

²⁴ Sesus ta mekywa tu my. Koikny bakta tu batu aty tohi zisapyzeky. Sesus zuba tawahi mynapamykysokota my.

²⁵ Iwatahi izikwy humo mysapyrëtsa tsimoziknaha. Katsa Deus pe tsimykarana-haze:

— O myzo Sesus humo myspirikporëtsa iwatsahi abo tsimypamykysokonaha. Ikia humo ka mykurëtsa — tsimaha. Iwaze Sesus humo mysapyrëtsa tsimoziknaha. Atahi tawahi koikny bakta tu. Deus bo mytsyhyryze

mynapamykysoko iwatahi Deus bo mymyoktyhyryk hỹ. Ihumo mymytsumuẽhĩkĩ iwatsahi mykurẽtsa hỹ.

²⁶ Atakta tsimytsumuẽhĩrẽta. Katsa mypunihikbyitsa tu batu sapy tsimaha. Sesus zikwy humo zuba mypuni-hikrẽtsa tsimoziknaha. Atahi tsimysapyrẽta hỹ. Batu zimyi. Isapybara bo batu mytsaty ziky. Kytsa asaktsa hawa sisapybyitsa mykaranaha ba mywa ziky my. Ata hi imysapyrẽnikita bjoikpe bo nido. Deus tuk tasapy anaeze mynapykyryk hỹ.

²⁷ Pibiyituhukutu tapara ziknapamykysonahatsa Deus wahoro zubata eze myraratsa ty ziknasiwezokonahaze. Asahi:

— O Deus mysapybyitsatu tsikykaranaha ikia myraratsa spu humo tymyokzohik. Atyryktsa sisapybyitsa tu nikaranaha humo kino niwatihi tysiokzohik — nikaranaha. Pororo ziknakaranaha.

Sesusta batu siwatsa my. Estuba zuba Deus bo tanury tynyny niy. Mysapybyitsatu tsikykaranaha anahumo hi nihyrikosokda, ba zikyrikosokdazo abaka tawahi ispitu my. ²⁸ Tapara Moises bo nitsaso. Deus kytsa nisi-hyrinymyrykyze taparaktsa iwahoro zubata eze ziknapamykysonahatsa nisiny. Asaktsa sipunihikbyitsa tu zimyikinaha. Bykyze zuba Deus tse babata ziwatawy. Bykyze itse babata pe:

— Ikia zuba kawahoro zubata eze tynapamykysokota awahi tynapamykysokota. Kahyrytsa tsyhyryze awahi tysitsumuẽhĩkĩkta. Ikia babata zuba batu zimyi — niy. Deus harere wasani hỹ. Sesus hi mynamybetesawyky my, tawahi mynapamykysokota my taharere tyhi mynakara.

8

Sesus mytsyhyryze Deus bo mynapamykysoikik.

¹ Sesus Kiristu zuba tapara Deus wahoro zubata eze mynapamykysokota ana hi tsipahahirinymyry tsihikiknaha. Atahi ipyrirykbyita tsimiharerewabyrêta hỹ. Atahi Deus tuk bijoikpe bo nitsuk, anaeze Deus panuryk taba modyhyky.

² Asaktsa Deus wahoro zubata ziknapamykysonahatsa Deus pokpedawy bo ziknapupukunaha anaeze Deus bo ziknapamykysoikiknaha. Ityryktsa tsyhyryze Deus bo ziknapamykysoikiknaha. Sesusta meky wa tu my. Deus wahoro zubata ata hi kytsa nizuknikinaha anaeze Sesus batu mopykyryk, atahi Deus hudikhudikwy bo bijoikpe eze mynapykyryk. Anaeze hi isapy mozik, anaeze mytsyhyryze Deus bo mynapamykysoikik hỹ.

³ Asaktsa Deus wahoro zubata eze ziknapamykysonahatsaktsa tisapyrêna ty Deus bo nyny ziknakaranaha. Deus hi nisiny iwatsahi kytsa tisapyrêna ty Deus bo nyny ziknakaranaha, siraratsa humo kino niwatihi ziknasiwezokonaha. Iwaze siraratsa ty Deus bo nyny ziknakaranaha. Sesus mytsyhyryze mopamykysokota ustsá ziknapamykysokonahatsa watsa Sesus isapyrênikia ty Deus bo nyny niy. ⁴ Atakta mybarawy ezekta batu ziknapamykysokota my. Ustsá Deus wahoro zubata eze ziknapamykysonahatsaktsa asaktsa Moises harere humo zuba yhỹ nikaranaha iwatsahi kytsa tisapyrêna ty Deus bo nyny ziknakaranaha.

⁵ Hawa ha ty bijoikpe eze tu wasani my. Wytyk ezeka hyrikoso zuba my. Deus parik Moises nizuknita atakta ihyrikoso zuba my, ihudikhudikwy baba hi bijoikpe eze tu anahi wasani my. Tubabatu Moises hara tykbaba humo tabete niriktohokoze Deus taparik hyrikoso ziwatawy — Nawaty — niy. Deus ipe niy:

— Kaparik ty pykyhytu tyzukni! Kahyrikoso hi abo pawatawy — niy. Ziknapamykysonahatsaktsa kytsa bo

nisitsumuēhīkīnaha Sesus bijoikpe eze tu mynamytsumuēhīkī. Atakta mytsumuēhīkītsa.

⁶ Deus tatse zipehaze ihyriziktsokzawy tisapyrēna ipe niy. Asaktsa Deus wahoro zubata eze ziknapamykysonahatsa, Rewi tsekokatsa sihyriziktsokzawy tisapyrēna. Sesus Deus tse mytsapuhyripyrywyta ihyriziktsokzawy tisapyrēna hỹ. Tubabatu Deus Moises bo nitsasokoze iharere humo tisapyrēna. Deus hi:

— Aparakbaha mysisapywyky — niy. Iwaze ziknapamykysokonahatsa humo nawa ha ty nitsaso astatu nikara, iwa kytsa nisisapywyky. Sesus bo nitsasoze iharere tisapyrēna, iharere mymysapywyky. Sesus humo mymysapywyky hỹ. Katsa anaharere bo hyỹ tsimykarannahaze ana humo hi myspirikporētsa tsimoziknaha. Ihumo kino niwatihi mysapyrētsa tsimoziknaha. Anaharere bo hyỹ tsimykarannahaze Deus tuk mywahi tsimynapykyryknaha iwatsahi mykurētsa tsimoziknaha Sesus humo Deus mymysapywyky hỹ.

⁷ Tapara Deus Moises bo nipamykysoko. Anaharere tisapyrēnaha zeka usta harere ty batu tyso. ⁸ Moises harere humo myzubaha simysapybyitsa niyziknaha iwaze sisoho Deus harere papeu humo ziwatahaka:

— “Aba usta harere Isareu tyryktsa

Sudeutsa bo motsasoko
abaka kaharere humo sispirikporētsa moziknaha.

⁹ Tubabatu taparaktsa ahadiritsa bo iktsasoko.

Esito ekze ikioktyhyryk.

Kaharere sibo iktsasoikik.

Kaharere humo batu hỹ zikaha.

Iwatahi siharere bo kawabybarawa nazukniki” — Deus niy.

¹⁰ Deus hi:

— Abaka usta harere Isareu itsekokatsa bo motsaso,
abaka kaharere sibo motsaso.

Kaharere humo simysapyrētsa moziknaha.

Kaharere bo mytsatyziu mynakaranaha,
kaharere humo ba zikspiriktsokdanaha.

Kaharere bo hỹ mykaranaha iwa mozihikiknaha.

Asahi kape sisopyk:

“O atazuba Deus my” maha.

Utakta ispe kasopyk:

“O asaktsa katyryktsa h̃” — my.

¹¹ Nawatsatu kahumo tsipiknynaha.

Iwatsahi situkytsa bo batu sihyrinomyry.

Situkytsa pe — O Deus tsinynahaktsa! — iwa ba ziktsaso.

Nawatsatu piknynaha iwatsahi isty peha peha byitahaktsa.

Kytsa myhyrizikwanibyitsa, myhyrizikwanitsa, nawatsatu iwa piknynaha.

¹² Simysapybyitsa tu nikaranaha

ana soho bo batu mytsatyzo my.

Simysapybyitsa tu ziknakaranaha humo myspiriktsokdabaik.

Simysapybyitsa tu nikaranaha mysiokzohik niy.

Iwa Deus harere papeu humo tatyryktsa soho botu ziwataha.

¹³ Tapara kyka mopykba. Ezytyk isapyzekeny mozik iwazenibykyka tsimoewynaha. Iwa Deus mype niy:

— Kaharere tapara tuky Moises bo iktsasoko ana bo ka mytsaty mytsaty byitaha! Abaka kaharere bo zuba hỹ tahaktsa! Iwatsahi ahamysapyr̃tsa tsimoziknaha — Deus niy.

9

Kiristu Deus hudikhudikwy bo nitsuk.

¹ Iwatsahi asaktsa Moises harere bo hỹ nikaranaha Deus bo:

— O ikia zuba tsamysapyrêta — pororo ziknakaranaha. Iwa Deus parik eze ziknakaranaha. Ataparik kytsa nizuknikinaha.

² Taparaktsa tahararatsa hwyk ty iparik nizukninaha. Tsapukte buruk panu ty zipokpedawynaha. Nataba panu ipokpedawy eze:

— Deus imysapyrênikita sapy my — niaha. Anaeze rikatsasapy ouro ty, sidisahawyzozowy kino niwatihi atabete hi atsikara ty Deus bo zozo ziknakaranaha. Zikziby-ituhukunaha zozozo ziknakaranaha. Iwa hÿ. ³ Iwaze usta taba ipokpedawy eze:

— Atakta imysapyrênikita babata sapy my — niaha. Anaka abazubaha niy.

⁴ Anaeze siraratsa wezowy ouro ty zoknihita. Ana bete iokmorênikia ty Deus bo zikziwezokonaha. Iwaze usta sinamysuk ouro ty zoknihita. Tsiziurêta. Anaeze joporosuk tsibik ouro ty zoknihita ty zik niaha. Mana zinaroko sidisahawy joporosuk eze pokpok niaha anaeze zik niaha. Iwaze taparakta Arõ zozowy ty bita niaha, tubabatu izozowy humo tasakarebaik. Tapara ky Deus harere Moises bo nitsaso iwaze Moises iharere harahare humo ziwatahaka. Harahare petok aha humo ziwatahaka ana harahare humo petokuha sinamysuk eze zik niaha. Iwa. Sinamysuk eze zik niaha.

⁵ Sinamysuk bete sihyrikosotsa sisapyrêtsa. Bi-joikpe iknyktsa hyrikosotsa. Sinamysuk tahasara harapu bete niapykyryk. Anaeze ziknampamykysokonahatsitsa simysapybyitsa nikaranaha, kytsa kino niwatihi simysapybyitsa nikaranaha, ana soho hi Deus bo nitsasokonaha:

— O Deus mysapybyitsa tsikykaranaha ana humo hi myraratsa tsiksibakanaha sispu bo iktsa tsimyze ana humo hi tymokzohik — nikaranaha. Iwaze Deus hi:

— Ahamysapybyitsatu tsikykaranaha ana soho humo hi takyriki ahararatsa ahasapyzeky tsiksibakanahaze pahokzohik — niy. Iwa tisapyrēna hỹ. Abaka ana soho ba pahahyrinymyry.

⁶ Iwaze Moises tukytsa ata parik nizuknibanaha iwaze asaktsa ziknapamykysonahatsaktsa ipokpedawy taba ziknapupuikiknaha. Anaeze tsizubarēna nikymynahaze Deus okzeka sihyriziktsokzawy ziknakaranaha.

⁷ Usta ipokpedawy tabaka taparaktsa ziknapamykysonahatsa tuk estuba zuba ibo ziknatsukuk. Ba zikzytyhykwa ziktsukuk. Iytyk tsehewywa eze zuba ziknatsukuk. Zinat-sukukze myraratsa spu zuba zikorokonaha. Iwaze Deus pe niy:

— O Deus kararatsa kasapyzeky ibeze iwatahi kamysapybyita tu ikykara tsikokzo. O Deus myraratsa ahyrytsa sapyzeky tsiksibanaha iwatahi simysapybyitsa tu nikaranaha tysiokzohik. Abaka myhumo akryri byihuja — nikara.

⁸ Katsa mytsaty tsimykarannahaze anapokpedawy eze taparakta ziknapamykysonahatsaktsa tuk estuba zuba zuruze inatsuk, Deus hyrikoso ana soho nimyhyrinymyryky. Hawa kytsa Deus sapy bo ba zikpupunaha Deus hyrikoso nimyhyrinymyry. Iparik atatuze kytsa Deus bo bijoikpe eze ba zikpupunaha.

⁹ Ziknapamykysonahatsa Deus wahoro zubata eze tuze, sisapyrēnikitsa ty zuba Deus bo nyny nikaranaha. Siraratsa ty kytsa sapyzekytsa Deus bo nasiwezokonaha. Iwatsatu siraratsa ty nyny nikaranahaze kytsa hi:

— Katsaktsa batu mysapy tsimaha, mysapybyitsa tu tsimykaranaha — nikaranaha.

Hawa ha ty ziknakaranaha Deus parik eze nimyhyrinymyryky. Aba zuba Kiristu mozumuze iwaze katsa Deus bo tsipomonaha. Ihumo mysapyrētsa tsimoziknaha.

¹⁰ Moises harere bo yh̄y nikaranaha. Wastuhu sidisahawy humo batu hauk niaha. Wastuhu siopuwy humo ba zikunaha. Sisopyk tyty tahakpikiknaha iwa ziknakaranaha. Sinury humo zuba siziurētsa niyzikiknaha, simiywynahatsa nikaranaha, iwa ziknakaranaha. Aibani Deus harere abaka nitsasokoze hawa Kiristu humo zuba mysapyrētsa tsimoziknaha ana harere hi taperyky.

¹¹ Iwatatu Kiristu izumu. Ata hi ziknapamykysonahatsa Deus wahoro zubata eze nisisapyzeken atahi nimitysumuēhīkī.

— Hawa ha ty isapyrēnikia ty ahabo nyny my — mykara. Deus bo mytsyhyryze mynapamykysoko! Batu iparik eze tu my, ana hi kytsa nizuknikinaha. Atahi bijoikpe bo Deus tuk tasapy Deus baze niapykyryk anaeye Deus bo mytsyhyryze mynapamykysoko, ana hi tisapyrēna.

¹² Deus tuk tasapyze aparakbaha hi:

— Atazuba mysapyrēnikia bo nitsuk. Estuba zuba nitsuk. Siraratsa spu ty batu wabehyryk niy. Hozipyrykza spu pikuzā spu iwa batu wabehyryk niy. Sispu ty Deus bo batu tywatawy ziknapamykysonahatsa Deus wahoro zubata siwatsa niy. Mysapyzeken nihyrikosokda iwatahi taspū tyty Deus bo zinyeny. Ispu humo mysapyrētsa tsimoziknaha iwatsahi mywahi Deus tuk tsimynapykyryknaha — nikaranaha.

¹³ Tapara kytsa simysapybyitsa ziknakaranaha, Moises mypehawwy bo batu h̄y ziknakaranahaze simysapybyitsa ziknakaranaha. Iwatsahi ziknapamykysonahatsa Deus wahoro zubata eze siraratsa spu ty nisinyzokonaha. Sisopyk humo hozipyrykza spu, pikuzā spu, pikuzā tsibik ziwezokonaha izohyri ty iwa nisinyzokonaha. Iwaze Deus okze wasani niyziknaha.

¹⁴ Iwa maha zeka Kiristu spu humo mysapyrētsa bābatsa tsimoziknaha. Ihumo myspirikporētsa. Kiristu batu

ziky tsimysapyrêta zuba. Bazimyi. Deus koikny baktatu ihyrikoso ituk mynapykyryk. Atatu nizihikik Deus bo itanyny niy, mysapyzeka nihyrikosokdaze iwaze Deus bo atatu itanyny niy. Atahi:

— O kazo ziknapamykysokonahatsa awahoro zubata eze siraratsa nisiwezobanahaze kytsa simysapybyitsa nikaranaha ikia hi:

“O asaktsa wasani maha siraratsa kytsa sapyzeka nisi-banaha iwatahi wasani maha” tsiktsasoko. Abaka kaspu humo aparakbaha simysapyrêtsa babatsa moziknaha, sisapyzeka ikyrikosokda iwatahi ikia ispe:

“O ahamysapyrêtsa babatsa tsimaha katsespu humo tsimy” — Kiristu niy.

Mysapyrêtsa tsimoziknaha iwatsahi mysapybyitsa tsikykaranaha mytsaty mytsaty byijataha. Hawa Deus koikny baktatu itsyhyryze tarabajaziu tsimykaranaha ana humo hi mytsaty tsimykaranaha.

Abaky Deus harere.

¹⁵ — Asaktsa Moises harere bo yhỹ nizihikiknaha tsahi tapara iharere bo batu h̃y ziknakaranaha iwatsahi zimyinahatsa tu nikaranaha. Kiristu simysapybyitsa nikaranaha humo nihyrikosokda. Abaka Sesus Kiristu hyrikosokdawy humo Deus simysapybyitsa nikaranaha mysiokzohik. Iwatahi Deus harere abaky mybarawy ezektsa bo niy. Ikiahatsa kawatawyhytsa tsimaha. Katuk ahawahi tsimynapykyknaha, Kiristu mytsapuhyripyrywyta ahasapyzeka nihyrikosokda iwatsahi ahamysapyrêtsa babatsa tsimoziknaha — niy. Iwa Deus Kiristu humo mymypsapywyky.

¹⁶⁻¹⁷ Kyze aty my zeka:

— O uta mohyrikosokdaze kahyrikyky ty abo nyny my — my. Mohyrikosokdaze ihyrikyky ty usta bo nyny my za.

Atatuze usta inamy batu ziakse. Ispitu zeka usta namy ba ziakse. Aty tsasoho tihi:

— Atakta nihyrikosokda — niy. Iwaze zuba kytsa piwabynahaze ihyrikyky ty usta piakse. ¹⁸ Taparaktsa mydiritsa siakbatsa siraratsa nisibanaha. Iwaze zuba Moises harere bo yh̃ nikananaha. ¹⁹ Moises Deus harere aparakbaha bo nitsasoko iwaze pikuzza tsibik zibeze hozipyrykza kino niwatihi zibeze sispu ty pihik ty tsakykyha niy. Joporosuk bo su niy. Iwaze iparikiha sazik ty isopo inarokoha nizokbatsi panu hozipyrykzazi nitsazikke isopo ity sok niyze izi tsitsairiharēna niyzik ispu humo. Kyze kytsa siharek bete su niy, ipapeu humo kino niwatihi siraratsa spu ty su niy. ²⁰ Kytsa bete, ipapeu humo kino niwatihi sispu ty su niyze ata hi:

— Deus harere mybo nitsaso iwatsahi ana harere bo yh̃ tsimahaktsa! Ana spu ahaharek bete su myze iwaze ikiahatsa Deus harere bo yh̃ tsimaha — niy.

²¹ Iwata Moises Deus parik bete siraratsa spu ty su niy. Iparik isapyrēnikia ty sibete niwatihi siraratsa spu ty susu nikara. ²² Asaktsa Moises harere bo yh̃ nizihikiknaha siraratsa ty ziknasibaikiknaha. Iwaze kytsa meky watu niyziknaha siraratsa spu humo. Deus anabo hi iktsa niyze bazik takyri kytsa simysapybyitsa nikananaha sispu humo nisiokzohik. Sinamy kino niwatihi siraratsa spu nisiharasusukuze tisapyrēna niyziknaha. Siraratsa sibaha byizeka batu sispu, iwaze Deus kytsa simysapybyitsa tu nikananaha batu isty okzohik. Iwa h̃y.

Sesus Kiristu mysapyzeken nihyrikosokda iwatahi Deus mysopyksapybyitsa tsimykaranaha mymyokzohik.

²³ Ziknapamykysonahatsa Deus wahoro zubata eze siraratsa ziknasibaikiknaha, aparakbaha sapyzeken ziknasibakanaha. Asaktsa bijoikpe bo Deus tuk tawahi

mynapykyryknaha ispu meky watu maha. Katsaktsa Kiristu spu humo, mysapyrētsa tsimoziknaha, ana humo hi bijoikpe bo mywahi Deus tuk tsimynapykyryknaha. ²⁴ Iwatahi Kiristu Deus iparik bo batu paku. Anaeze ky bo kytsa suknihi bo ba ziktsuk. Iparik hyritywata bijoikpe eze tu, batu paku. Bijoikpe bo Deus tuk tasapy. Anaeze hi Deus bo mytsyhyryze mynapamykysoikik iwa mymytsumuēhikī.

²⁵ Iytyk tsehewa estuba zuba taparakta ziknapamykysonahatsa Deus wahoro zubata eze imysapyrēnikita babata sapy bo nitsuk. Nitsukze siraratsa spu zebykyrykze. Deus ana bo hi iktsa niyze aparakbaha simysapybyitsa nikaranaha nisiokzohik. Kiristu anabo batu paku atatu Deus bo itanyny mykara. Estuba zuba Deus tuk tasapy iwatahi ibo itanyny niy. ²⁶ Ziknapamykysokonahatsa wa horokba ziknakaranahatsa tu nihyrikosokdaikiknaha. Mybarawy nizuknize sinini mynakara batu iwa hỹ. Estuba zuba nihyrikosokda ba zikyrikosokdazo. Mybarawy epykybyize Kiristu wytyk bo inasikze nihyrikosokda iwatahi izumu imysapybara zimoewyba.

²⁷ Nawatsatu tsimyhyrikosokdanahaze Deus metutu mymysapy.

— Ata hi my:

“Asaktsa wasani my. Utsa batu simysapy my” — my. Iwa myhuak ty mybo nyny my, asaktsa Sesus harere bo yhỹ ahabyitsaktsa sinini ykarawy bo mysipehahik. ²⁸ Kiristu niwatihi estuba zuba nihyrikosokda. Deus bo atatu itanyny niy. Taparakta Deus wahoro zubata eze siraratsa nisiba siwatsa Sesus mysapyzekenihyrikosokda. Iwaze mysapybyitsa tsikykaranaha Deus pahaokzohik. Sesus botu nihyrikosokda mybarawy bo myziksizo. Myziksizoze batu mysapybara bo baziky,

myziksizoze izikwy humo mysapyrētsa tsimoziknaha. Abaka atahi mytaperyky hỹ, ihumo mysapyrētsa tsi-moziknaha.

10

¹ Kyze asaktsa Moises harere bo yhỹ nizihikiknahaze Deus harere tsikaeni zuba sihyrinomyry. Deus wahoro zubata eze taparakta tuk ziknapamykysonahatsa siraratsa nisibaikiknaha, iwatsahi pororo ziknakaranaha kytsa sit-syhyryze nisibakanaha iwatsa tu kytsa batu sispirikpo.

² Simysapyrētsa niyziknaha zeka batu tahapetu sisopyk:

— O katsaktsa batu myku imysapybara humo tsikykarannahatsa hi mysukatsihikrētsa tsimykaranaha — nikaranaha. Simysapyrētsa niyziknaha zeka siraratsa tyka beze beze byitaha. ³ Iytyk tsehewa tu siraratsa nisibakanaha pororo ziknakaranaha, tahamysapybyi humo nikaranaha iwatsahi siraratsa nisibanaha. Iwatsatu batu tyso:

— Abaka mysapyrētsa. Deus okzeka wasani tsimaha mysapybyitsa tsikykaranaha pahaokzohik — nawa batu tyso. Asahi:

— Katsa tsimyinahatsa. Hawa mysapybyitsa tsimykaranaha — nikaranaha. ⁴ Pikuza spu hozipyrykza spu kino niwatihi simysapybyitsa ziknakaranaha anahumo hi batu siokzo.

⁵ Iwatahi Kiristu izumu. Ziokpyryze Deus pe niy:

— O kazo mybarawy ezektsa siraratsa mysibanahaze akubyita tsimykara.

Mybarawy ezektsa tisapyrēnikia ty abo nyny mahaze akubyita tsimykara.

Kanury tsipikymyze kabo nyny tsimy iwatahi my-barawy ezekta mozik.

⁶ Mybarawy ezekta siraratsa mysibaze imysapybyitsa nikara naha humo, akubyita tsimozik. Aokze siraratsa nikorobanahaze simysapybyri humo akubyita tsimozik.

⁷ Iwatahi utakta: “O Kazo mybarawy bo mynasik iwatahi aharere bo zuba hyĩ mynakara. Iwa my. Hawa kasoho botu papeu humo ziwatahaka” — niy.

Iwa Kiristu tazo pe niy.

⁸ Tapara iwa niy:

— Mybarawy ezektza siraratsa ziknasibakanahaze Deus iakubyita ziknakara. Tisapyrēnikia ty ibo nyny ziknakanahaze iakubyita niyzik. Deus okzeka siraratsa ziknasiwezobaiknahaze iakubyita ziknakara. Kytsa simysapybyitsa nikaranaha humo siraratsa nisibanahaze iwatsahi simysapybyitsa nikaranaha ana humo hi Deus nisiokzohik iwatatu iakubyita nikara — niy.

Iwa Sesus Deus soho niy. Tubabatu Moises taharere humo nisipehahik iwatatu Deus sisopyk humo iakubyita ziknakara. ⁹ Iwaze Kiristu hi:

— Uta wytyk bo mynasikze aharere bo zuba hyĩ mynakara iwaze kahumo akurēta tsimozik — niy.

Iwa myze mymywatawy abaka siraratsa wezo humo niwazuba mykara.

— Deus harere bo pykyhytu zuba hyĩ mynakara iharere bo zuba hyĩ mynakara iwaze siraratsa ty ka abaka beze beze byitaha tsimaha. Myzubaha sapyzekeny mohyrikosokda — niy. Iwatahi Deus mysapybyitsa tsikykananaha mymyokzohik Kiristu mysapyzekeny nihyrikosokda.

¹⁰ Sesus Kiristu Deus nizihikik naha humo zuba hi hyĩ nikara iwa zikzuruku. Ikahaty zuba nihyrikosokda iwa

Deus bo atatu itanyiny niy. Nihyrikosokdaze mysapyby-itsa tsikykaranaha Deus ihumo mymyokzohik. Iwatsahi ihumo mysapyrëtsa tsimoziknaha, ana hi Deus mybo piwatawy.

¹¹ Zikbyituhukutu Deus wahoro zubata eze ziknapamykysokonahatsa siraratsa ziknasiwezoikiknaha. Deus wahoro zubata eze ziknariktoriktohokonaha tahahyrik-tsokzawy humo zuba ziknakaranaha. Siraratsa nasiwezokonahaze kytsa simysapybyitsa nikaranaha batu isty okzohik. Deus siraratsa koro bo iktsa nikaraze kytsa simysapybyitsa nikaranaha ana humo hi batu isty okzo.

¹² Sesus Kiristuta ikahaty zuba nihyrikosokda. Nihyrikosokdaze kytsa simysapybyitsa nikaranaha Deus Sesus humo nisiokzohik. Sesus Deus bo atatu itanyiny niy. Deus baze ipanuryk taba mynadyhyky. Anaeze tawahi mynapykyryk.

¹³ Anaeze hi Sesus tasukyrytsitsa mysiperyky, iharere bo yhÿ mykaranaha, ana hi piperyky. Deus botu ipe niy:

— Uta kazikwy humo asukyrytsitsa aharene bo hyÿ mykaranaha — niy. ¹⁴ Ikahaty zuba nihyrikosokda. Katsa mysapybyitsa tsikykaranaha ihumo nimyokzohik iwatahi nihyrikosokda. Ihumo mywahi mysapyrëtsa tsimoziknaha.

¹⁵ Deus hyrikoso ana ty hi nimyhyrinymyryky. Tapara Deus harere papeu humo ziwatahaka:

¹⁶ — Aibani uta katyryktsa kazikwy humo simysapyrëtsa moziknaha.

Abaka sibo motsasoze kaharere bo mytsaty tynakaranaha.

Abaka sakurëtsa kaharere bo mytsatyziu mynakaranaha.

Kaharere humo ba zikspiriktsokdanaha — niy.

¹⁷ Kyze Deus hyrikoso iwa ziwatahaka.

— Hawa ahamysapybyi tsikykaranaha ana bohi ba mytsaty ziky.

Hawa ahasopyksapybyri tsikykaranaha soho ba mytsaty ziky — Deus hyrikoso niy.

¹⁸ Mysapybyitsa tsikykaranaha Deus taokaniki abaka batu. Iwatsahi mysapybyitsa tsikykaranaha humo siraratsa ba ziksiwezozonaha. Sesus Kiristu nihyrikosokdaze mysapyzekeniyzik iwatahi Deus mymyokzohik mysoho ty batu tywaby. Atahumo hi mysapyrëtsa tsimoziknaha.

O kytsa Deus bo tsimahaktsa Sesus Kiristu humo.

¹⁹ Iwaze hi:

— O katukytsa mysapyrëtsa tsimoziknaha. Mypuni-hikrëtsa tsimoziknaha. Deus bo tsimypamykysokonahaze katsa ipokso batu mypyby tsimaha. Sesus Kiristu mysapyzekeniyhyrikosokda iwatsahi Deus imysapynikia bo tsimypupunaha. Hawa taparaktsa:

“Atakta imysapyrënikta babata sapy bo” ziknapupukunaha siwatsa Deus bo tsimynapamykysokonaha. Batu ipokso mypyby — tsimaha.

²⁰ Taparakta ziknapamykysonahatsa tuk ana ipokpedawy panu ana bo hi pororo ziknakara iwaze Deus bo ziknapamykysoikik. Katsa Sesus mysapyzekeniyhyrikosokda naha humo Deus bo tsimypamykysokonaha. Nihyrikosokdaze ipokpedawy panu nisykbaik abaka Sesus humo Deus bo tsimaha. Atakta ispituzo iwatahi, iske ezytyk wa, atakta Deus ske tsimaha. Iwatsahi ibo tsimynapamykysokonaha hỹ.

²¹ Sesus mynapamykysokota my. Atahi abazubata my. Deus tyryktsa mysitsumuëhĩkĩ, ata kino mymytsumuëhĩkĩ hỹ. ²² Iwatsahi Deus bo tsimypamykysonahaktsa! Ihumo tsimyspirikpobabanahaktsa! Ba ahape tu ahasopyk:

— Tozeka ja kasapybyita mykara. Kamysapyrêta ja. Batu kanyhy — iwa batu tyso. Sesus humo mysapyrêtsa hỹ. Hawa mymytsyhyrytsapik nahawa iwaze myziurêtsa tsimoziknaha, iwatsa katsa ihumo mysapyrêtsa tsimoziknaha. ²³ Hawa ha ty Deus motsasoko atsatu mykara. Katsa hi:

— Deus mymysapywyky ituk mywahi tsimynapykyryknaha — tsimaha. Batu tyso:

— Deus ja mymysapywy. Tozeka ja ituk mywahi tsimynapykyryknaha. Batu mynyhy — iwa batu tyso.

Deus harere bo zuba tsimykaranaha, iwatsahi iharere humo tsimyspirikpotohinahaktsa kytsa! Iharere tsiperynaha. ²⁴ Tyharape pokzitsikinahaktsa! Tyharape tsumuêhĩnahaktsa! Hawa Deus humo mysapyrêtsa tsimoziknaha iwatsahi ustsya kytsa tysisapywykynaha! Katsa sihumo mypokzitsirêtsa iwatsahi tysisapywykynahaktsa.

²⁵ Tynakykpyknahaktsa kytsa! Wastuhu Sesus tuktsa zukbyitsahi tsiwabynaha. Ba siwa zikaha. Tynakykpyknahaktsa iwatsahi Deus harere ty tanymyryky. Tyharape hokusukninahaktsa! Mypehatsa atsoko myziksizo iwatsahi taperyky iwaze tynakykpyknahaktsa!

²⁶ Abaka Deus harere wasania ty tsiwabynaha. Ana harere bo hi hỹ tsimykaranaha tsa tu batu ma zikaha, iwaze Deus myhumo taokanizo. Iwatsahi katsa Deus pokso mypybyrêtsa tsimozikzonaha. Iwaze batu mysapyzo, iwatatu Sesus mysapyzekenihyrykosokda iwatsahi batu myhuakak mysapybyi humo tsimynakaranaha.

²⁷ Hawa Deus mykara ana pokso hi mypybyrêtsa. Katsa iharere bo hỹ aha byizeka sinini tsimykaranaha. Iwaze Deus mymypehanaha taperyky. Hawa mykpyri piwezonaaha waha sinini tsimykaranaha. ²⁸ Tubabatu asaktsa Moises harere bo batu hỹ niahaze ustsya kytsa nisibaiknaha.

Kytsa petoktsa hawazeka harakykbyihitsa nitsasokona-haze:

— O atakta isapybyitatu nikara, Moises harere bo batu hỹ niy — nikaranaha. Kytsa atsatu nitsasokonaha zeka iwaze ata maku zibezenaha. Kytsa ihumo batu simypokz-itsiu iwatsahi zibezenaha.

²⁹ Abaka kytsa siwatsa maha, asahi Deus tse humo batu siharereziu. Deus botu ispe:

— Ahamysapyrẽtsa tsimoziknaha. Katse ahasapyzeyki nihyrikosokda ahamysapybyitsa tsikykaranaha Sesus humo zahaokzohik iwatsahi ahamysapyrẽtsa tsimoziknaha — niy. Asaktsa katse harere bo batu hỹ niaha. Asahi:

— O Deus atse nihyrikosokda katsaktsa ihumo batu mo-spirikpo, iharere bo batu hỹ tsimaha — mykaranaha. Iwa niahaze Deus hyrikoso soho pisapybyikinaha. Ihyrikoso sihumo tsimypokzitsiukrẽta my, asaktsa ihumo pisapy-byikinaha. Iwatsahi sinini mykaranaha. Kytsa Moises harere bo batu hỹ nikaranaha sinini nikaranaha. Asa hi Deus hyrikoso zisapybyirikinaha sinini mykaranaha hỹ.

³⁰ Hawa Deus tyryktsa tuk mykara iwa myhyrinymyrẽtsa. Deus harere papeu humo botu ziwatahaka:

— Tubabatu utakta katyryktsa mysitsapusare iky. Abaka batu.

Asaktsa kaharere bo hyỹ mykaranaha zeka, sisukyrytsitsa pokso mysibetesaka.

Asaktsa zisapywykynaha isapyrẽnikia ty sibo nyny my.

Uta ispe my:

“Ikiahatsa tsisapywykynaha my”.

Utsa kaharere bo batu hỹ mynakaranaha.

Utakta ispe my: “Ikiahatsa batu mysapy tsikykaranaha” my.

Simysapybyitsa tuze sinini ykarawy bo mysipehahik — niy.

Iwa Deus harere papeu humo botu ziwatahaka. ³¹ Deus koikny baktatu tawahi mynapykyryk. Atakta myhumo takyriki zeka sinini tsimaha. Wasani tsimyzurukunaha zeka ihumo batu mypyby!

³² Hawa tsikykaranaha bo mytsaty tsimaha. Tapara Deus wasania ty tsiwabynahaze ana humo hi hỹ tsikykaranaha. Deus hyrikoso ahatuk niapykyryk. Asaktsa Sesus humo batu sispirikpo pahasininiwykynahaze tsihokdaharēna h̃y. Ikiahatsa ahakubyrisorokrētsa tsikyziknaha.

³³ Utsa kytsa Sesus harere bo batu h̃y mykaranaha pahasapybyikinaha, myzubaha bo pahasapybyikinaha. Iwaze kytsa okzeka sihumo sinini tsikykaranaha. Kytsa sizubarētsa ana bo hi iktsa nikaranaha. Iwaze ikiahatsa kytsa tysitsumuēhīnaha asaktsa sinini mykaranaha tysitsumuēhīkīnaha. Tsimyhyrikosokdanaha zeka batu ahapyby.

³⁴ Ahatukytsa Sesus humo sispirikpo ana humo hi sakyriukrēnikitsa hurukwy bo kytsa mysipeha iwatsahi tsiknasisukpararenaha sihumo ahamypokzitsirētsa iwatsahi sibo tsiknakozorenaha. Ahasukyrytsitsa ahanamy ziaksenahaze ahakurētsa tsikyziknaha. Ikiahatsa tihi:

— Deus mymysapywyky isapyrēnikia ty mybo nyny my, bijoikpe eze ituk tsimynapykyryknaha mywahi ituk tsimynapykyryknaha. Ana hi tisapyrēna h̃y. Mynamy aiba tohi zuba myworoba Deus mybo nyny mahaka ana ka batu hawa tohi ziky tawahi mynapykyryk — tsimaha.

³⁵ Iwatsahi ahapunihikrētsaktsa kytsa! Ahapunihikrētsa tu zeka Deus tisapyrēnaha ty ahabo nyny my. ³⁶ Hawa ha ty Deus mozihikik pykyhytu tahaktsa! Ahakubyrisorokoktsa! Iharere bo hỹ tsimaha zeka ahapunihikrētsa tsimoziknaha. Iwaze Deus isapyrēnikia ty

botu ahabo nitsasoko anatyhi ahabo nyny my. ³⁷ Deus harere papeu humo:

— Aibani zuba atakta myziksizo.

Iokboha zuba pykaremyny.

³⁸ Kahyrytsa kahumo mospirikpotohinaha

iwatsahi katuk tahawahi mynapykyryknaha.

Kahumo sispirikpo byizeka sihumo batu kaku — Deus niy. Nawa Deus harere papeu humo ziwatahaka.

³⁹ Katsa Deus humo mspirikporëtsa. Batu aty tohi mysoho tihi:

— O asaktsa Deus humo batu sispirikpo iwatsahi sinini ykarawy bo mykaranaha — iwa batu aty tohi mysoho ba ziktsaso. Katsa Deus humo mspirikporëtsa iwatsahi ituk mywahi tsimynapykyryknaha. Mysapyrëtsa tsimoziknaha. Iwa hỹ.

11

Taparaktsa Deus humo sispirikporëtsa nikaranahaze hawa nikaranaha.

¹ Kyze Deus harere bo hỹ tsimykaranaha iwatsahi ihumo mspirikporëtsa iwaze hawa ha ty taperyknaha atsatu mybo nyny my. Ihumo mspirikporëtsa mypetu mysopyk:

— Hawa ha ty Deus bo tsikzapykyknaha anatyhi mybo nyny my — tsimaha. ² Tubabatu taparaktsa Deus harere bo hỹ ziknakaranaha ihumo sispirikporëtsa. Iwatahi Deus sisoho ziknatsasoko:

— O asaktsa kaokzeka simysapyrëtsa — niy.

³ Deus harere bo hỹ tsimykaranaha zeka taharere eze mybarawy nizukni, ana hi myhyrinymyrëtsa. Aba ibo iktsa tsimykaranaha nizukni. Zinynahabara humo kino nizukni. Taparaka batu tsarawyky iwaze hi tsizubarëna nizukni.

⁴ Aba Abeu soho bo mytsaty my, atakta Deus harere bo hyĩ ziknakara ihumo tispirikporêta hỹ. Atahi Deus isapyha ty Deus bo nyny niy. Iziky kino niwatihi isapyha ty Deus bo nyny niy. Abeu Deus bo nyny niy wasani niy. Atahi Deus humo tispirikporêta hỹ iwatahi Deus ipe niy:

— Ikia kaokzeka wasani tsimy — niy. Iziky bo batu tyso. Atakta Deus humo batu ispirikpo iwatahi isapybara ty ty nikara. Abeu nihyrikosokda. Tubabatu nihyrikosokda iwatatu iharere humo batu myspiriktsokdahu, Deus humo ispirikpota babata niy.

⁵ Aba Enoke soho bo mytsaty my, atakta Deus harere bo hyĩ ziknakara ihumo tispirikporêta hỹ. Iokzahabyitatu Deus bo nido, Deus zikwy humo hi nido. Itukytsa batu ity nyzo niaha, Deus bo botu nido. Tapara idobyize Deus isoho tihi:

— O ata humo kakurêta — niy. ⁶ Katsa Deus harere bo batu hỹ tsimykaranaha, iharere humo mospirikpo byizeka myhumo batu iaku. Katsa ibo tsimypamykysonahaze mypetu mysopyk:

— O Deus koikny baktatu my, myhumo tsimypokzitsirêtsa mymysapywyky hỹ ana humo hi myhyrinymyrêtsa — tsimaha. Iwaze myhumo tsakurêta my.

⁷ Aba Noe soho bo mytsaty my Deus tihi:

— Mybarawy ezektsa pihik humo mysiharazuzukbaik iwaze mysiakbabawyhik — niy. Ana soho ziwaby Noe hyĩ niy. Hyritsik batu inyhy iwatatu Deus harere bo yhỹ niy. Tsaraha puêtsikbyita nizukniki iwaze ioke ihyrytsa ahatsa sirehetsa moziknaha. Noe taoke zuba, tahyrytsa tuk Deus harere bo hyĩ nikaraze ustsya kytsa iharere bo batu hỹ ziknakaranaha ziwatawyky. Iwatahi Deus hi:

— O ikia kaokzeka wasani tsimy — niy.

⁸ Aba Abarão soho bo mytsaty my. Deus ipe niyze:

— Nabo meky botu tsikasapykta! Nabokta! — niy. Hyĩ niy. Inyhybyita tu mekybotu Deus harere humo niukuru, iwatahi ihumo tispirikporēta niukuru. ⁹ Kyze anabo zumu. Ana soho Deus tihi:

— Naka asapy mozik — niy. Ana bo zumuze isukmota wata niukuru. Batu wahoroko niy. Siraratsa hwyk iparik niy, tatse Isake tuk niapykyryk, itsekoka Sako kino niwatihi iparik eze niapykyryknaha. Deus ispe niwatihi:

— Naka ahasapy mozik — niy. Deus harere bo hyĩ nikananaha ihumo sispirikporētsa iwatsahi iparik eze niapykyryknaha. ¹⁰ Abarão ihudikhudikwy eze ziperyky, anaeze hi Deus mozukni anaeze hi tisapyrēna ana kino ziperyky. Anaka ba zikokda.

¹¹ Aba Sara soho bo mytsaty my. Deus ipe niy:

— Tsiktsaikbatatsa tu tsipabykyhy — niy. Deus harere bo hyĩ ihumo tispirikporētatsa iwatsahi tabykyhy. ¹² Ibarikta Abarão nitsaikbata Deus harere humo ioke tabykyhy. Itsekokatsa sizubarētsa niyziknaha. Hawaze itsekokatsa my. Batu aty tohi ihyrinymyry, byrisoiktsa watsa, batu myhyrinymyry, nimyra hyritywaha niwatihi tsizubarēna hiba, ba ziksiwatawynaha.

¹³ Deus humo sispirikporētsa Abarão, Isake, Sako ahatsa iwa Deus humo sispirikporētsa babatsa. Deus botu ispe niy:

— Anaka ahasapy mozik — niy. Iwatsahi ana soho hi taperyky. Tahatuktu sisopyk:

— Deus harere humo naka mysapy mozik mykaranaha. Mytsekokatsa naka sisapy mozik iharere humo hỹ — nikananaha. Iwa Deus harere bo hyĩ nikananaha ihumo nispirikpokonaha iwatsahi sakurētsa niyziknaha. Deus harere nitsasokoze atsatu mykara ana humo hi sihyrinymyrētsa iwatsahi sakurētsa moziknaha.

— O katsakta mybarawy eze tsimypykyryknaha tuze mysukmotsa tsimaha. Kasapy bo tsipiharamunaha zuba — niaha. Nihyrikosokdanahaze ana humo hi batu sisukmo iwatsa tu Deus harere humo sakurētsa. ¹⁴ Asakta mot-sasoikiknaha:

— O kahudikhudikwy tsipiharamunaha zuba — mykaranaha usa hudikhudikwy taberiki. ¹⁵ Tahasapy ekze inaonaha tsa hi batu mytsaty zikaha. Tahasapy bo mytsaty mykaranaha zeka iwaze zikzisionaha. Batu ihokdaha. ¹⁶ Asakta usa hudikhudikwy taberiki, ana bo hi mytsaty nikaranaha. Anahudikhudikwy bijoikpe bo tisapyrēna. Deus hi anahudikhudikwy sibo nyny my. Deus sihumo batu sikpyby. Ipe nikaranahaze:

— Katsakta Deus hyrytsa tsimaha, ihumo myspirikporētsa — nikaranaha. Deus ana harere bo yhỹ niy.

¹⁷⁻¹⁸ Aba Abarão soho bo puētsik mytsaty my. Abarão tatse ty Deus bo nyny niy. Deus botu ipe niy:

— Atse mopurukze ihumo atsekokatsa sizubarētsa maha — niy. Yhỹ nikara iwatahi ana harere humo hi itse nipuruk. Kyze Deus Abarão niyze hawa kahumo iakparawy babata pinymyry tsihikikze, iwatahi atakta kaharere bo ma my zeka pinymyry tsihikik. Iwaze Deus ipe niy:

— Atse ikahatahi tsibezehikta! — niy. Iwa niyze — Atakta kahumo tsimypokzitsiarēta babata — mytsaty nikara. Iwaha humo Abarão ihumo iakparawy pi-hyrinymyryky. Deus ipe niyze:

— Atse ikahatahi tsibezekta, Abarão iharere bo hỹ niy. ¹⁹ Tatse asiba zibeze tatuktu isopyk:

“O Deus katse Isake mynahyrizikpowy” — niy. Abarão Deus harere bo hỹ niy ihumo tspirikporēta babata my, ana bo Deus nikozoze ipe niy:

— Niwazubakta! — niy. Iwaze Abarão tatse tawahoro bo zisihyrykzo. Atahi inahyryzikpo tawata niy. Iwa Abarão tatse Deus bo nyny niy, hawa ihumo tispirikporêta babata ziwatawy.

²⁰ Aba Isake soho bo mytsaty my. Atakta Deus harere bo hyĩ nikara ihumo tispirikporêta iwaze tahyrytsa pe:

— Deus pahasapywyky, bykyzehu isapyrênikia ty ahabo nyny my — niy. Iwa ihyrytsa Sako Esau ahatsa bo nikara.

²¹ Aba Sako soho bo mytsaty my. Atakta Deus humo tispirikporêta zumuzakaze Deus pe niy:

— O ikia zuba amysapyrênikita ahumo kakurêta hĩ — niy. Nitsaikbata tu tazozowy humo tatyhuziwy niy. Sako tatsekokatsa pe:

— O Deus isapyrênikia ty ahabo nyny my — niy. Iwa Sose hyrytsa pe niy.

²² Aba Sose soho bo mytsaty my. Atakta Deus harere bo hyĩ nikara ihumo tispirikporêta nikara zumuzakaze tatukytsa pe:

— Isareu tsekokatsa Esito ekze tsinaonahaze, kapoiktsa tysizozikyknaha nabo kahudikhudikwy bo tu tysiytyknaha — niy.

²³ Aba Moiseszo soho bo mytsaty my. Asaktsa Deus harere bo hyĩ ziknakaranaha ihumo sispirikporêtsa iwatsahi tahatse ziokpitsihiknaha. Esito ezektsa pehakatsa tihi:

— Sudeutsa makuskyrytsa mopuruknahaze tysibanaha! — niy. Iwatatu Moises zo ihumo batu pyby. Itse tsiziurêta iwatsahi byzoje harakykbyihi zirahaze tabykyhy ziokpitsihaha.

²⁴ Aba Moises soho bo mytsaty my. Atakta Deus harere bo hyĩ ziknakara ihumo tispirikporêta. Esito ezektsa ipe sisopyk:

— Abazubata ste tatse tu tsimy — nikaranaha. Taypykze ana harere batu iakparawy. Deus harere bo hyĩ nikaraze itukytsa bo iakparawy. ²⁵ Situk sinini ziknakara. Imysapybara tu batu hỹ nikara, batu tabo zuba ziknakara. Deus bo zuba ziknakara iwatahi tatukytsa tuk sinini ziknakara. ²⁶ Batu tapetu isopyk:

— O Esito eze tu mynapykyryk zeka kanamy tsizubarēna hỹ my — iwa batu tyso. Deus tyryktsa nisitsumuēhĩ tsihikik hỹ. Iwatahi tatukytsa harere bo batu hỹ nikaranahaze Kiristu wata niyzik. Kytsa iharere bo kino niwatihi batu hỹ nikaranaha, Deus tyryktsa nisitsumuēhĩkĩ zeka tsakurēta hỹ niy. Inamy tsizubarēna humo tsikaeni zuba iakparawy. Iwatahi Deus ziperyky:

— O atahi isapyrēnikia ty kabo nyny my — ana humo kino tsihyrinymyrēta niy.

²⁷ Deus harere bo hyĩ nikara ihumo tispirikporēta tu Esito ekze niparak. Ispehatsa kyriwy humo batu ipyby. Deus harere bo zuba hyĩ nikara ihumo tispirikporēta tsakurēta. Deus bo mytsaty ziknakara nawa zikzuruku iwatatu Deus bo batu iktsa niy, isoho humo mytsaty ziknakara. ²⁸ Moises Deus harere humo hyĩ nikara ihumo tispirikporēta iwaze Isareu tsekokatsa pe:

— Bijoikpe iknykta Esito ezektsa hyrytsa taparaktsa mysiba. Iwatsahi hozipyrykzatsa spu ty ahahokbowytsa bo susu taha. Iwaze bijoikpe iknyktsa iharapu taba my ahahyrytsa taparaktsa batu mysiba ahahyrytsa mysiharamu zuba. Hozipyrykzatsa spu bo iktsa niyze ahahyrytsa ba ziksiba — niy.

Kyze hawa Deus sihumo tsimypokzitsiukrēta mytsaty ziknakaranaha tahamyikaha bo pororo ziknakaranaha Paskoa inarokoha bo. ²⁹ Isareu tsekokatsa kino niwatihi Deus harere bo hyĩ ziknakaranaha ihumo sispirikporēta.

Iwatsahi buburu zuba zitsikzanaha, siekze pihik nitsehespyk. Buburu zuba Pihik Tsikyiriri inarokoha niy. Bykyze Esito ezektsa atsatu koikny zitsikzakanahatsa tu pihik nisiharapusu. Batu aty tohi arehabyitsa.

³⁰ Aba Isareu tsekokatsa soho bo mytsaty my. Asaktsa Deus harere bo hỹ ziknakaranaha ihumo sispirikporëtsa niaha. Sipehatsa Sosue tuk Deus humo sispirikporëtsa h̃y. Serikoho okpedawy haraharetsa ty iokarawyhyta iwatsahi sisukyrytsitsa ba ziknapupunaha, anahi inakarabaik. Nawa puruze usta tsyhyry humo petok, Serikoho petaba nikarikinahaze atsoko haraharetsa naktsaktsakbaiknaha.

³¹ Aba Rahabe soho bo mytsaty my. Atatsa Serikoho ezektatsa niy. Tapara kytsa hapik paikpa ziknaparakatatsa. Aiba eze atatsa Deus harere bo hỹ ziknakara ihumo tispirikporëtatsa. Sosue kytsa Serikoho hudikhudikwy bo nisipehaze iwa nizokparakanaha, asahi sodadutsa pokso niwakiknaha. Iwaze atatsa wahoro bo izumunahaze atatsa ispe niy:

— Pakutaha. Ikza pahaokpitsīhihik, bykyze kytsa pahaberinahaze ba zahapetumunaha — niy. Bykyzehu Serikoho hudikhudikwy ezektsa Deus harere bo batu h̃y zikaha, iwatsahi kytsa nisibanahaze Rahabe batu. Atatsa itukytsa batu isty ba. Atatsa Deus harere bo hỹ nikara ihumo tispirikporëtatsa tu nitare.

³² Aba ustsā kytsa Deus harere bo hỹ ziknakaranaha ihumo sispirikporëtsa ahabo batu motsaso, Kideō, Barak, Sasō, Sepata, Dawi, Samue, ustsā Deus sohokotsa iwatsa sisoho batu motsaso, sisoho piwataha zeka ba zikpyk.

³³ Asaktsa Deus harere bo hỹ ziknakaranaha ihumo sispirikporëtsa h̃y. Ustsā tyryktsa bo niwatsorokonahaze sisapy ziaksenaha iwatsahi niwakiknaha. Deus okzeka zisapywykynaha iwatahi isapyrēnikia ty sibo nyny

niy. Wastuhu kytsa Deus humo sispirikporētsa iwatsahi ustsā kytsa parinitsa bo nisihorokiknaha, iwatsatu parinitsa humo batu siborohuk iwa Deus harere bo hyŷ ziknakaranaha ihumo sispirikporētsa ziwatawykynaha.

³⁴ Wastuhu kytsa Deus humo sispirikporētsa iwatsahi ustsā kytsa izo zuba bo nisioktsokiknaha, iwatsatuze izo humo ba zikarakoronaha iwa Deus harere bo hyŷ ziknakaranaha ihumo sispirikporētsa ziwatawykynaha. Ustsā kytsa asiba nisibanaha sokorotsapuzezety asaktsa niwakiknaha, Deus sihumo tsimypokzitsiukrēta iwatsahi niwakiknaha. Ustsā kytsa siakubyitsa tu sipuni-hikrētsa niyziknaha. Ustsā bipyritsa bo niwatsorokonahaze sipunihikrētsa niyziknaha. Iwatsahi bipyritsa sipokso niwakbaiknahaze nanabyitaba nitururukuknaha. Iwa ziknakaranaha Deus harere bo hyŷ ziknakaranaha ihumo sispirikporētsa.

³⁵ Aba wytykyryk soho bo mytsaty my. Asiza hi Deus harere bo ziknakaranaha ihumo sispirikporēza iwazahi sihyrytsa botu niakbanahatsa tu Deus nasihyryzikpowy tahajeza bo tu ziksizonaha.

Usiza sakyriukrēnikitsa nisimyitsapyriwykynahaze sinini nikaranahatsa nihyrikosokdanaha humo. Sakyriukrēnikitsa ispe:

— Deus harere bo yhyŷ ahabyi zeka ihumo ahaspirikpobyihu ja iwatsahi ba zikamyitsapyrizonaha — niaha. Anahi batu siwabytoktoho. Myhyrikosokdanaha humo batu sipyby. Asiza tihi:

— Batu. Tsimyhyrikosokdanaha zeka, bykyzehu Deus mymyhyryzikpowyzo, iwaze mywahi ituk tsimynapykyryknaha hŷ — iwa mytsaty ziknakaranaha. Iwaze kytsa nisibanaha.

³⁶ Utsa kytsa Deus harere bo hyĩ ziknakaranaha ihumo sispirikporẽtsa iwatsahi kytsa ziknasiapikiknaha. Nisisapybyikinaha. Nisikikinaha, myraratsa hwyk tsazikihi ty nisikikinaha. Karikutsitsiwytsa ty nisitsipatsawarakanaha, iwaze sakyriukrẽnikitsa hurukwy bo nisihuruknaha. Asaktsa Deus harere bo hyĩ ziknakaranaha ihumo sispirikporẽtsa tu kytsa nisimyijaikiknaha nisisininiwykynaha.

³⁷⁻³⁸ Utsa kytsa Deus harere bo hyĩ ziknakaranaha ihumo sispirikporẽtsa sisukyrytsitsa haraharetsa nisiparakanaha iwa nisibakanaha. Utsa kytsa Deus harere bo hyĩ ziknakaranaha ihumo sispirikporẽtsa sisukyrytsitsa tsapukte buruk bokokik niaha iwa nisibanaha. Sokorotsapuzeze ty nisibakanaha. Utsa kytsa Deus harere bo hyĩ ziknakaranaha ihumo sispirikporẽtsa tahasukyrytsitsa pokso niwakiknaha batu sisuku. Tahasuk ty myraratsa hwyk ty ziwowokonaha, hozipyrykza hwyk hi kaberito hwyk hi kino niwatihi tahasuk ty niaha. Jerukbara tahasapy niaha. Hara jobonita bo zukzuk niaha batu wahoroko. Harahare hoke bo tahokpitsikĩnaha, wytyk hoke eze niwatihi tahokpitsikĩnaha. Batu sidisahawyky taharapa zikzykikiknaha. Kytsa simyijaikiknahatsa ziknasiapikiknaha. Kytsa sisoho:

— O asaktsa sakmyitsakohok ziknakaranaha. Kytsa okzeka sakmyitsakoho niaha. Deus okzeka simysapyrẽtsa hĩ, mybarawy ezektsa batu sapy mykaranaha iwatsahi katyryktsa humo sisikpybyrẽtsa — Deus niy.

³⁹ Asaktsa Deus harere bo hyĩ ziknakaranaha ihumo sispirikporẽtsa babatsa. Deus sisoho hi:

— O ikiahatsa tsahamysapyrẽtsa tsimaha — niy. Simysapyrẽtsa mybarawy eze zikzurukunaha. Deus isapyrẽnikia ty sibo nyny ahaziwazy niy. Iwatsa tu nihyrikosokdanaha. ⁴⁰ Deus aparakbaha nisisapywytsi-

hikik. Iwatahi ziperyky mybo mytsaty nikara. Abaka asahi iharere bo hỹ mynakaranaha ihumo sispirikporētsa myzubarētsa mymysapywyky. Ihumo mysapyrētsa tsimoziknaha. Iwatahi katsakta Deus zikwy humo mysapyrētsa tsimoziknaha, ustsya kysya taparaktsa kino niwatihi ihumo sispirikporētsa simysapyrētsa moziknaha. Myzubarētsa Sesus watsya tsimoziknaha ihumo mysapyrētsa babatsya tsimoziknaha. Iwa h̃y.

12

Deus myzo.

¹ Kyze asakta taparaktsa sizubarētsa Deus harere bo ziknakaranaha ihumo sispirikporētsa. Hawa haeze zikzurukunaha tsiwabynaha ana humo hi katsa hi:

— O Sesus harere humo pykyhytutaha hỹ tahaktsa. Hawa mymysapybyitsa tsikykaranaha tsimoewynahaktsa — tsimaha.

Atakta moparakze tapara pomo tshikik amy titsakyririkrēna zikatsimoewy. Iakubyri mozumu zeka iwatatu ba pyk ziky. Katsa mysapybyitsa tsikykaranaha iwa tsimoewynahaktsa! Nanabyi soho bo ka mytsaty mytsaty byitaha! Katsakta tsipimyikinaha iwatsahi Sesus harere humo hỹ tahaktsa! Tapara zumu tawa tsimoziknaha. Iwaze Deus humo myspirikporētsa tsimoziknaha.

² Sesus bo mytsatziutahaktsa! Ihumo Deus harere bo hỹ tynakaranahaktsa! Atahi Deus humo tispirikporēta h̃y. Deus harere bo hỹ ziknakara. Iwata tsimoziknahaktsa! Atakta nihyrikosokdaze tatuktu isopyk:

— Bykzehu kazo tuk kakurēta mozik. Asakta zikmyijakanaha iwatatu sisapyzky iharapatawyhyta humo myhyrikosokda. Kysya hi:

“O kysya iharapatawyhyta humo mohyrikosokda zeka sisikpybyrētsa maha.” Siwa ba mytsaty ziky batu

kasikpyby. Deus harere bo hỹ ikykara iwatahi ituk kawahi mopykyrykze kakurēta h̃y ana soho bo mytsaty mynakara. Iwaze tsihokdaharēna Deus humo kamypokz-itsiarēta iwatatu mohyrikosokda — niy. Abaka Deus panuryk taba modyhyky. Deus tuk ityryktsa mysipeha.

³ Hawa Sesus sinini ziknakara naha bo mytsaty tahaktsa! Sakyriukanikitsa ihumo batu siakparawy. Asaktsa Deus harere bo batu h̃y zikaha sispirikpobyitsa tu iwatsahi ziaknikinaha. Atahi tsipunihikrēta h̃y. Iwata bo hi mytsatytahaktsa! Iwaze iwata ahapunihikrētsa tsimoziknaha. Ihumo tsimyspirikpotohinaha.

⁴ Simysapybyitsa mymypeha tsihikiknaha. Deus wasania ty sibo tsiktsasonahaze ana humo hi zahamyijakanaha. Asahi pahabanahatsa ziwazy. Sesus wata batu sinini tsimykaranaha. ⁵ Deus harere bo mytsatyziutahaktsa! Iharere papeu humo botu ziwatahaka iwa niy. Deus tahyrytsa humo nawa isopyk iwatahi botu ziwatahaka:

— Kahyrytsa pahasininiwyky zeka tsiwabytoktonahaktsa!
Ikiahatsa sinini tsimykaranaha ana humo hi tsinymyrykynaha.

Utakta pahapehahikze tubyizuba taha!

⁶ Mypehatsa myhumo tsimypokzitsiukrēta iwatahi mymsinininiwyky
iwaze mysapyrētsa tsimoziknaha.

Kahyrytsa spirikpowy bete mysipehako iwaze

wasani mykaranaha iwa kaharere bo piwabytoktonaha — niy.

Iwa Deus harere papeu humo niy. Ana humo hi ahaspiriktsokda byihuja!

⁷ Iwaze sinini tsimykaranahaze ahakubyrisoroktsaktsa!
Sinini tsimahaze ahatuktu tsimaha:

— O myzo bijoikpe eze tu mysapyrētsa tsimoziknaha iwahi mozihikik, iwatahi pahasininiwyky — tsimaha.

Katsa myhyrytsa pimyinahaze mytahasapehanaha, Deus mykara nawatihi.

⁸ Aty itse isopyksapybyita tuze ipe ahabyizeka:

— Atakta isopyksapybyita atsebyitatu my — tsimaha. Deus kino niwatihi tahyrytsa mysipehaka iwatsahi simysapyrëtsa moziknaha. Ispehahuk byizeka batu ihyrytsa babatsa zikyzyknaha. ⁹ Mypykybyize myzotsa harere bo yhÿ tsikykaranaha. Ziknamypehakanahaze siharere bo yhÿ ziknakaranaha. Asahi kytsa zuba iwatsa tu siharere bo yhÿ tsikykaranaha. Deus hi bjoikpe eze tuze ihyrikoso my, ata harere humo pykyhytu hyÿ tahaktsa! Iwatahi ata mymypehaze iharere humo atsoko hyÿ tsimykaranaha, iwa ituk mywahi tsimynapykyryknaha.

¹⁰ Myzotsa ziknamypehakanahaze mysapyrëtsa tsikyzyknaha. Sisopyk humo wasani tsikaha, ana hi nizihikiknaha. Deusta tsihyrynymyrëta iwatahi iharere wasani nikara, iwa mysapyrëtsa babatsa tsimoziknaha ana humo hi mozihikik, Sesus wa tsimoziknaha ana hi mozihikik. ¹¹ Deus mymypehaze mysukatsihikrëtsa tsimoziknaha. Sinini tsimykaranahaze batu myku. Bykyzehu mykurëtsa tsimozikzonaha. Mydikrëtsa Deus harere humo hyÿ tsimykaranaha, iwatsahi mysapyrëtsa tsimoziknaha hÿ. Mysapyrëtsa tu Deus harere humo hyÿ tsimykaranaha iwatsahi mykurëtsa hÿ.

Deus harere bo zuba hyÿ tsimykaranaha.

¹² Iwatsahi ahabo ka mytsaty mytsaty byitahaktsa! Sisukatsihikrëtsa tsysitsumuëhînahaktsa! Asahi tsikaeni zuba Deus harere humo hyÿ mynakaranaha. Iwaze ahahumo sispirikporëtsa moziknaha. ¹³ Wasani haty zuba ikiahatsa mytsatziutahaktsa! Iwatsahi sisopyksapybyitsa tu simysapyrëtsa moziknaha.

¹⁴ Ahaōtutsa pauksitsa bo tysisapywykynahatsa kytsa! Harape tybetsak betsak byitaha! Mysapyrētsa babatsa tsimoziknaha. Mymysapybyitsa tu tsimykaranaha zeka mypehatsa Sesus ba zynynaha. ¹⁵ Deus myhumo tsimypokzitsiukrēta, myzibiyituhukutu myhumo tsimypokzitsiukrēta iwatsahi tyharape tsumuēhīnahaktsa kytsa! Deus harere humo hyỹ tsimykaranaha iwa tyharape tsumuēhīkīnaha. Wiharata iskpita wata anahi imyrawywy wata ahabyitaha. Wiharata myrawy batu sapy my. Aty Deus harere bo batu hỹ ahabyi zeka itukytsa kino niwatihi Deus harere bo batu hỹ zikaha. Atakta batu imysapy my. Wiharata iskpita wata. Iwatsahi pykyhytutaha kytsa! Ahatukytsa tysitsumuēhīkīknahaktsa! Iwaze kytsa ahaharere humo ba zikmyinaha.

¹⁶ Asahi mekta oke tu pipyrirykyze tysitsumuēhīnahaktsa! Kytsa Deus harere bo zuba hyỹ mykaranaha tyharape pokzitsinahaktsa! Esau wata ba zikaha. Atahi Deus harere bo batu hỹ nikara. Atahi taparakta taypykta myhyrizikwani. Tabo zuba mytsaty ziknakara. Tsaraparēta niyze tatsy pe niy:

— O katsy adisahawy ty kabo nynytykta. Uta tapara ikypykta hi myzo mohyrikosokdaze ihyrikyky kanamy mozik! Abaka adisahawy ty kabo nyny tsimy zeka ikia taypykta wata tsimozik, myzo mohyrikosokdaze ihyrikyky anamy mozik. Ikia kasapyzeky tsimozik iwatahi Deus pasapywyky. Iwa tsimyzeka adisahawy huak zuba — niy. Deus harere humo batu hỹ niy, iwatahi tadisahawy bo zuba mytsaty nikara. Iwabyitaha. ¹⁷ Aibani zuba Esau myhyrizikwanita niyzik tsihikik. Izo itsyhyryze Deus bo nipamykyso tsihikik ba hawa tohi zikaha. Itse iykpykbita tsyhyryze botu Deus bo nipamykyso. Iwa hỹ. Tapara taypykta tisukatsihikrēta nikara. Nipuziuku. Deus

pisapywyky ana hi nizihikik. Hawa niy ahahyrinymyrëtsa iwatsahi iwata byitaha!

¹⁸ Kyze taparaktsa myzotsa hara jobonikita bo zumukunaha hara inarokoha Sinija. Zumunahaze izo zuba. Bijoikpe satata nioktsirõrõ miwa niyzik. Zopoktsa inabybyknaha. Ana pokso sipybyrëtsa. Ana kino nimypybytykynaha. ¹⁹ Sibekeresuka hyritywa ziwabynaha. Deus yksoho ziwabynahaze sipybyrëtsa nikaranaha:

— O niwazubaktsa! katsa mypybyrëtsa — niaha.

²⁰ Moises tihi:

— Hara jobonita bo ka zukzuk byitaha! Myraratsa harasukpetara bo ka dodo byitaha. Estuba harasukpetara mydo zeka tsibezekta! Haraharetsa tysipaparanahaktsa iwatahi tsibezenaha — niy. Ana harere pokso sipybyrëtsa.

²¹ Moises niwatihi tsipybyrëta. Hara bete niapykykze nanabyi bo nikozone ana pokso hi tsipybyrëta:

— Nanabyi bo ikozoze ana pokso mytydydykyktu. Kapybyrëta mykara — niy.

²² Niwazuba! Ikiahatsa batu siwatsa tsimaha. Deus harere tsipiwabynahaze ahapybybyihu ja. Ikiahatsa usta hara bo jobonikita bo tsikzumunaha. Ata hara Siaõ inarokoha, anaeze hi Serusarëhe hudikhudikwy my. Deus koikny baktatu isapy bo tsikzumunaha. Isapy Serusarëhe inarokoha bijoikpe eze kino niwatihi. Anabo hi tsikzumunaha. Anaeze Deus tsumuëhïtsitsa mynapykyknaha, bijoikpezektsa sizubarëtsa mynapykyryknaha. Deus humo sakurëtsa nikaranaha.

²³ Kiristu Deus zipehata ityryktsa bo tsikzumunaha. Siwatsa ityryktsa tsimaha niwatihi. Sizubarëtsa Deus tyryktsa maha. Tapara taypykta tawata myhyrizikwanitsa moziknaha. Deus papeu humo sinaro ziwatahaka ana papeu bijoikpe eze tu my iwatsahi sakurëtsa hÿ. Ikiahatsa Deus bo tsikzumunaha. Atakta kytsa huak ty sizubarëna

ty nyny my. Asaktsa mybarawy ezektsa wasani ziknakaranaha, iwatahi isapyrēnikia ty sibo nyny my, tahawahi Deus tuk mynapykyryknaha. Utsa mybarawy ezektsa simysapybyitsa tu ziknakaranaha Deus sinini ykarawy bo mysipeha. Ikiahatsa sihyrizikararawytsa bo tsikzumunaha. Asahi Deus humo simysapyrētsa niyziknaha.

²⁴ Sesus mytsapuhyripyrywyta bo tsikzumunaha. Ata humo hi mysapyrētsa tsimoziknaha. Abaka Deus harere mybo nitsasoko. Nihyrikosokda iwatsahi ispu humo mysapyrētsa tsimoziknaha. Hawa taparaktsa siraratsa spu Deus bo wabehyryk ziknakaranaha, katsaktsa Sesus spu humo mysapyrētsa tsimoziknaha ispu tisapyrēna hỹ. Kaĩ tatsy zibezehik iwatsahi ispu humo mytsaty tsimykarana-haze. Katsa Deus pe tsimaha:

— O Deus ikia Abeu spu tsipitsapusare tsimaha. Sesus mysapyzekenihyrikosokda iwatsahi ispu bo mytsaty tsimykarana-haze, Deus pe tsimaha:

“O Deus mysapybyitsatu tsikykaranaaha iwatahi Sesus spu humo tsimymyokzo” tsimaha.

²⁵ Iwatsahi Deus harere bo wabyziutahaktsa! Tubabatu Deus hara Sinija inarokoha bo niy. Moises Deus harere taparaktsa bo nisihyrinymyrykik. Batu hỹ — niaha. Iwatsahi sinini ziknakaranaha, sihuak ty Deus sibo nyny niy. Batu siaku. Abaka Deus bijoikpe ikny mymyhyrinymyryky. Iharere bo yhỹ ahabyi zeka sinini tsimykaranaaha hỹ. ²⁶ Sinija jobonita bo izumuze kytsa bo nitsaso, nitsasokoze mybarawy nitydydykyk tu. Abaka mytuk mopamykysokozo atahi:

— Mybarawy pitydydywyzo. Mybarawy pitydydywyzoze. Bijoikpe kino niwatihi pitydydywyzo — niy.

²⁷ Deus hi:

— Estuba zuba mybarawy pitydydykyzo — niy. Iwatahi mybarawy nizukni hana bo ja meky watu mozikzo. Mybarawy bjoikpe kino niwatihi izikwy humo ezytyk mozikzo. Itydydykokbara zuba motare. ²⁸ Deus hudikhudikwy ba zihokza, anaka itydydykokbara. Deus myzubaha bo abazubata mozik ba hawa tohi zikzukninaha. Anaeze ituk tsinapykyryknaha. Iwatsahi Deus bo tsimysakibazikiknahaktsa kytsa!

— O Deus ikia zuba apunihikrēnikita. Ikia zuba amysapyrēnikita ahumo ka mykurētsa hỹ. Abaka mywahi atuk tsimynapykyryknaha ana humo hi mykurētsa — tsimaha.

O kytsa iharere humo pykyhytu wabyziutahaktsa! Hawa ha ty mozihikik naha ty zuba tsimahaktsa! Atahi abazubata ihumo mypybyrētsa iwatsahi iharere bo zuba hỹ tsimykaranaha. ²⁹ Deus harere bo hỹ tsimykaranaha ihumo myspirikporētsa. Izo mokorobaik nahawa. Deus izo waha, asaktsa iharere bo yhỹ ahabyizeka nasipykwy izo waha hỹ.

13

Hawa tsimyzurukunaha Deus myhumo tsakurēta.

¹ Kyze ikiahatsa Sesus tuktsa tyharape pokzitsikinahaktsa! ² Sisukmotsa ahawahoro bo mozumunaha zeka ikiahatsa hi:

— Mywahoro bo paku paku tynaha ahawanu ty haĩ haĩ taha — tsimaha. Sihumo ahamypokzitsirētsa tsimaha. Tubabatu wastuhu kytsa sisukmotsa pe:

— Paku paku taha — niaha. Sisukmotsa zubatsa ja nikaranaha asahi bjoikpe iknyktsa Deus tsumuēhĩtsa niaha.

³ Asaktsa sakyriukrēnikitsa hurukwy eze niapykyryknaha sibo mytsatyziu tsimykaranaha! Sibaze tu watsa sibo mytsaty tahaktsa! Tysisapywykynahaktsa. Kytsa

sinini mykaranahaze sibo mytsatyziutahaktsa! Ahape tu tsimykaranaha:

— Tozeka ja katsa kino niwatihi sinini tsimykaranaha — tsimaha. Iwatsahi tysisapywykynaha.

⁴ Ikiahatsa hi tsikaha:

— O katsa tsimymysukzanahaze wasani tsimaha — tsikaha. Wasani hiba. Aty ustatsa pihuahua tsihikikze batu isopyksapy my. Amatatsa ustatsa barikta pihuahua tsihikikze batu isopyksapy my. Iwa tsimyzurukunaha zeka Deus pahamyitsapyriwyky.

⁵ Ahaokyrysaro soho bo ka mytsaty mytsaty byitahaktsa! Ahanamy humo ahakurëtsa ana kino tsikaeni zuba tuzihikiknaha! Deus hi ahape my:

— Utakta ahapok baze tu mynapykyryk, ikiahatsa kakparawy iwatahi ba zahaerek — my. Iharere humo ahakurëtsa hÿ. Deus ahasoho humo ba zikspiriktsokda. ⁶ Iwatsahi ahapunihikrëtsa tsimoziknaha. Ustsaktsa sipy-byrëtsa pe:

— Mypehakatsa mymytsumuëhîkî.

Kytsa pokso batu mypyby.

Hawa kytsa mybo mykaranaha ana pokso batu mypyby.

Deus hi myhumo tsimypokzitsiukrëta mynakara — tsimaha.

⁷ Ahapehatsa soho bo mytsaty tahaktsa! Tubabatu Deus taharere ty zahahyrinymyrykynaha. Hawa zikzurukunahaze ahaspiriktsokdabyihu ja. Hawa wasani ziknakananaha. Nihyrikosokdanahaze Deus humo sispirikporëtsa hÿ. Siwa tahaktsa kytsa! Ikiahatsa kino Deus humo tyspirikpotohinaha.

⁸ Sesus Kiristu kino atahi my. Hawa tapara ziknakara aba kino niwatihi mynakara. Aiba eze kino niwatihi astatu mynakara. Koikny baktatu mykara hÿ.

⁹ Ustsa kytsa siharere pahahyrinymyrykynaha zeka siharere meky watu maha. Deus harere humo batu zahahyrinymyry. Mydisahawy soho humo pahahyrinymyrykynaha. Pahaspihikbatakanaha. Siraratsani tsimymydisahakanaha zeka wasani my. Siraratsani ty hauk ahabyizeka wasani my. Deus harere humo zuba mysapyrëtsa tsimoziknaha atahi mymysapywyky hỹ.

¹⁰⁻¹¹ Tubabatu Deus wahoro zubata eze taparaktsa ziknapamykysonahatsa iwa ziknakaranaha. Siraratsa nisi-ibaiknaha mysopyksapybyitsa tsikykaranaaha humo nisi-ibaiknaha. Deus siraratsa spu bo iktsa niyze iwatahi nisiokzohik. Iwaze siraratsa spu Deus imysapyrënikia bo zibykyryk.

— Taparakta ziknapamykysokota imysapyrënikia bo nitsuk — niaha. Anaeze Deus siraratsa spu bo iktsa niyze taakaniki iwatahu kytsa sisopyksapybyitsa nikaranaha humo nisiokzohik. Kytsa siraratsa nurytsa nokponi ziknasiskiknaha. Sihudikhudikwy bara botu nasiskiknaha. Anaeze nisiwezokonaha. Batu sizoho ziboronaha.

Siraratsa wata Sesus nihyrikosokda. Mysapyzekenihyrikosokda iwatsahi ihumo mysapyrëtsa tsimoziknaha. Hawa siraratsa nurytsa sihudikhudikwy bara botu ziknasiskiknaha, iwaze Sesus nihyrikosokdaze, kytsa sihudikhudikwy bara botu zibezenaaha. Deus ispu bo iktsa niyze iwatahi mysapybyitsa tsikykaranaaha nimyokzohik.

¹² Sihudikhudikwy bara botu nihyrikosokda. Kytsa sispirikpobyitsa tu nizukyryknaha. Anaeze iharapatawyhyta humo zihyryzikiknaha. Iwaze mysapyzekenihyrikosokda. ¹³ Iwatsahi Sesus wata tsimahaktsa! Mysapyzekenihyrikosokda. Iwatsahi hawa Sesus mozhikikze tsimaha. Kytsa myharere bo yhỹ ahabyizeka wasani my. Mymymyijakanaha zeka wasani my. Iwatahaktsa!

¹⁴ Katsakta mybarawy eze tu tsimyzurukunaha, mysapy eze tu tsimynapykrykspyknaha hawa eze tamiwy. Usa hudikhudikwy taberi. Bijoikpe myhudikhudikwy baba mozik. Ana hi mysapy mozik. Anaeze Deus tuk tsimynapykryknaha. ¹⁵ Iwatsahi Deus bo tsimysakibaziknahakta! Katsa hi:

— O Deus myzo Sesus humo ikia bo tsimypamykysokonaha. Ikia zuba amysapyrēnikita. Ikia zuba abazubata. Ikia humo ka mykurētsa tsimoziknaha — tsimykaranaha. Ana hi Deus piwabyze tsakurēta mozik. Tubabatu kytsa siraratsa ty Deus bo nyny ziknakaranaha. Abaka myraratsa ty ba nynyzo zikaha. Abaka myharere ty ibo tsimytasokonaha. Iwatahi myharere humo tsakurēta mozik.

¹⁶ Sinamybyikitsa tysitsumuēhīnahakta! Asakta batu sidisahawyky ahadisahawy ty sibo nynyta. Kytsa bo tysisapywykynahakta! Ahaspiriktsokda byihuja. Iwatahi Deus ahahumo tsakurēta mozik.

¹⁷ Ahapehatsa harere bo ma tynakaranahakta! Siharere humo pykyhytutaha hȳ tsimykaranaha. Ahahyrizikararawytsa humo simypokzitsiukrētsa. Deus bo hawa pahapokzitsikinaha zeka motsasokonaha. Myzaharapokzitsikinaha iwaze ahamysapyrētsa tsimoziknaha. Iwatsahi pahatsumuēhī tsihikiknaha. Siharere bo ma tsimykaranaha zeka sakurētsa maha. Siharere bo yh̄ ahabyi zeka sisukatsihikrētsa maha. Iwa zeka ba zatsumuēhīnaha.

¹⁸ O kytsa mytsyhyryze Deus bo typamykysokonahakta! Deus okzeka wasaniha humo zuba tsimyzihikiknaha. Mypetu mysopyk iwatsahi batu tyso. — Sozeka ja wasani tsizurukunaha. Batu mynyhy — iwatahi batu tyso. Katsakta Deus okzeka wasani tsimykaranaha ana humo hi myhyrinymyrētsa h̄y.

¹⁹ O kytsa ahabo myziksi tsihikikzo. Deus bo katsyhyryze typamykysonahaktsa! Ikiatsa hi:

— O Deus myzo aidytynykta mybo tyziksizo — tsimaha.

Deus bo mopamykysoko.

²⁰ Uta Deus bo ahatsyhyryze mopamykyso:

— O Deus ikia humo zuba sakurētsa moziknaha. Ikia hi mypehatsa Sesus tsikzihyrizikpowy. Abaka sihumo tsimypokzitsiukrēta hozipyrykza perytsa wata atahi hozipyrykzatsa mysiperyky my. Sisapyzekenihyrikosokda iwatsahi meky watu niyziknaha, ihumo simysapyrētsa niyziknaha iwatsahi atuk tawahi mynapykyryknaha hỹ. ²¹ Myzo aharene bo zuba hyỹ tynakaranaha, ana humo kino tysitsumuēhī! Hawa tsimyzihikik ana humo kino tysizikwykyrykta. Ahumo sipunihikrētsa moziknaha. Hawa tisapyrēna humo tysitsumuēhīkī. Asahi:

“Sesus Kiristu ikia amysapyrēnikita. Ikia zuba tsahyryzikporēta” iwa tawahi mykaranaha ana hi myzo bo myzapykyky — my.

Iwa Deus bo ahatsyhyryze mopamykysoko.

Abaka pepykbaka.

²² Kyze katukytsa kaharene tsiwabytoktonahaktsa! Utakta pahakusukniki iwatsahi ikiaatsa Sesus tuktsa babatsa tsimoziknaha ana humo hi papeu humo ahabo piwatahaka. Kahumo ja ahakubyrisorokok kawatahaha pykyhytu tsipinymyrynaha. Kapapeu humo jokboha zuba iwatahaka. ²³ Mytsy Timoteo soho tawaby tsihikik. Sakyriukrēnikitsa hurukwy ekze zoihik. Iwatahi piperyky. Mozumu zeka ituk ahabo tsimynakozorenaha.

²⁴ Katsaktsa ahapehatsa bo, Sesus tuktsa sizubarētsa pe:

— O mytukytsa ahahumo myhyrizikbarëtsa — tsimaha. Sesus tuktsa Itaria ezektsa kino niwatihi ahahumo sihyrizikbarëtsa.

Deus pahasapywyky.

²⁵ Ahatsyhyryze Deus bo mopamykysoko. — O myzo tysisapywyky sihumo amypokzitsiukokta! — my. Niwazuba.

Deus Harere Aibaky Sesus mymyspirikpoko naha New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
